

景
文
集
六





景文集
(六)

宋部撰

景文集卷三十三

內制

賜樞密副使王堯臣生日禮物口宣

識裁精深。器懷冲邵。典司內密。參慮幾微。惟素簡之導寒。屬左弧之屆旦。禮優近府。恩著上臺。加惠餽奉。侑驪醪酒。庸厚樞庭之數。且爲族宴之榮。當體寵私。所宜祇受。

賜樞密副使孫沔生日禮物口宣

才居上哲。地在內樞。懋宣一德之規。協贊萬幾之務。迎長紀候。載誕協辰。錫以縹醪。頒茲生餽。用示臺恩之厚。且資族宴之榮。當體眷私。所宜祇受。

賜樞密使宋庠生日禮物口宣二首

俊乂大臣。耆明舊德。首正開序。載誕協辰。爰命寵頒。所宜祇受。

元精異稟。大雅克生。蔚輔本朝。賁有盛德。誕惟吉日。慶屬首正。國體同休。臺恩著範。餽奉有碩。醪酒惟醇。用助宴私。式精禮意。

賜宰臣劉沆生日禮物口宣

任重台司。寄深時柄。爰屬誕辰之吉。用稽蕃錫之文。式示眷懷。且昭毗倚。

北京賜賀正旦兩蕃人使御筵口宣

卿等遠涉歲陰。竝趨元會。馳輶永路。彌節離都。乃眷歡勤。俾均宴勞。

班荆館賜契丹賀正旦人使到闕御筵口宣

卿等肅持邦聘。祇會歲元。載驅使牡之華。已舍郊郵之邇。用伸宴犒。參慰歡勤。

賜王德用酒果口

卿持節之藩。出車遵路。已涓良日。宜重祖行。飲具臨頒。予懷增眷。

就驛賜契丹賀正旦人使錦褥被銀鈔羅唾盂孟子等口宣

卿等馳止使輶。憩茲賓館。勤勞備至。休沐攸宜。特頒器服之華。用適宴居之便。

賜契丹兩蕃人使賀正旦酒果口宣

卿等已展聘儀。稍淹賓次。年華集貺。節物多歡。各適所懷。無嫌樂飲。

賜契丹賀正旦人使迴北京御筵口宣

卿等肅馳歸傳。還舍離都。得無道路之勤。加涉陽和之始。宜申宴衍。式慰征行。

賜王德用御筵口宣

卿肅持瑞節。近撫价藩。出宿在辰。祖行增悵。宜申異眷。敷錫宴羞。

雄州白溝驛傳宣撫問契丹賀乾元節人使兼賜御筵口宣

卿肅將歡幣。來會慶辰。涉遠已勤。入疆云始。俾陳宴豆。少憩征郵。

北京賜契丹賀乾元節使副御筵口宣

卿等竝飭使華。恭趨朝慶。已舍離都之近。諒多持節之勞。俾洽宴慈。用昭眷渥。

撫問契丹國信使兼賜御筵口宣

適當盛暑。遠駕輶軒。惟辭命之是恭。勤道途而罔憚。特頒宴具。聊示歡慈。

賜王貽永批答

樞宥之地。任切喉襟。朕選爾忠慎。參此機劇。自頃狡寇時擾五邊。屯戍調發。事多平日。卿宜力念治義。無不爲。方倚斯猷。以底嘉績。何所嫌間。堅避寵名。況易退者士之細概。責成者國之本務。惟卿深識。宜諒朕懷。累書批復。理無順許。往安官守。卽斷來章。所請宜不允。

賜杜衍乞退第二表不允批答

西土未靖。師久留屯。朕賴卿忠果。幹總樞軸。宜力四載。既有成勞。今抒懇奉章。願去機任。夙昔惟念。未得其由。將謀者精而聽之粗歟。獻者衆而從之寡歟。中行亮節。得微有懷。間言飛詆。朕無聞焉。何遽卷懷。欲

徇冲潔。雖安小諒。有缺大猷。況柄臣進退。繫民休戚。幸勿煩執。方倚咨詢。所請宜不允。

賜章得象已下批答

南方壽星。每歲爲候。今見于庚寅甲夜。澤潤焯明。揆占惟應。君其逢吉。卿等樂聞瑞兆。鋪述慶辭。欲以美祥。遂刊實錄。勉從所請。良用缺然。

賜章得象乞罷第一表批答

卿識度闊達。謀謨淹正。比圖舊望。爰冠上司。而勤勞王家。朝無異議。翊戴寡德。朕所自知。雖輔政七年。已究不績。永惟萬務。方倚厥成。遽閱奏封。願歸宰柄。詳觀所啓。憮然動懷。且軍革尙興。權綱須乂。實賴元弼。偕陟大猷。儻獨徇知止之高。而外愆爲國之計。君臣同體。旣不云然。進退大方。亦將未亮。姑停遜執。以副眷期。所請宜不允。

賜王貽永讓恩命第一表不允批答

卿有林父之忠。吳漢之謹。匪懈于位。無伐厥勞。自幹樞庭。多歷年所。參和以濟大事。先計以敘諸戎。功成弗圖。報于何有。用膺置之重。以疇基命之勤。誕告廟廊。亶無異論。遽披露奏。方切冲懷。誠有敦于雅俗。詎所期于同體。官不容曠。命則惟行。往哉爾諧。昭體予志。所讓宜不允。

賜杜衍乞退不允批答

卿更踐劇職。遂冠內樞。鯁亮之素。底衷無隱。朕得朝咨夕訪。克又權綱。比日以卿懇愾致辭。感慨祈罷。因有前旨。欲賒後期。冀介節孤操。終爲事屈。忽閱今奏。殊乖此心。且詩重老成之謀。史稱魁壘之輔。皆作時模表。寄國典刑。未聞茲人以年爲解也。矧疆陲務總。餉日疲。共濟艱難。萬賴忠力。宜徇公議。毋滯冲懷。所乞宜不允。

賜杜衍第二表乞退不允批答

國家左宰府。右樞省。二三執政。皆諸臣之選。朕所與均休戚。責謀謨。任天下之綱維者也。其于進退。可輕議哉。卿直清方嚴。明銳開濟。裁抑私謁。達練事經。洒然羣望。推爲碩老。朕方倚以機管。隆乎治平。而累章求罷。弗亮敦勉。何專以已伸而不爲邦屈。重于獨往而忽此共濟耶。矧年高慮精。道勝疾損。固當務近醫劑。參實陽休。安服而官。姑惠予采。所乞宜不允。

賜皇叔德文第一表不允批答

卿茂親夙望。台鉉將牙。澹焉冲遠。躋于華皓。聿圖庇本。特用推恩。僉疏郡封。光啓王爵。宗盟爲重。國論旣孚。何列謙辭。尙停寵冊。便當祇受。以副褻懷。所讓宜不允。

賜皇兄允讓第一表不允批答

朕惟強幹之誼。公姓攸先。列爵之等。王封茲重。以卿志力宗謹。屬望親賢。庀秩本宗。領節戎鎮。休有令譽。

當圖爾勞。用擇蕃要。以光書社。何煩露奏。尙執謙懷。況定命旣頒。公言胥協。毋淹寵數。速卽欽膺。所讓宜不允。

賜杜衍等批答

保章視夜。南極告祥。雜候靡差。圓暉有爛。聞之典緯。屆乃壽祺。卿等幹掌內樞。歡逢嘉應。露封率籲。溢美形言。徒亮勤誠。尤增慙德。所賀悉知。

賜皇兄允讓第一表讓恩命不允斷來章批答

卿屬懿地。崇望華志。美朕所以推常棣之誼。重盤石之宗。始啓王藩。聿茂恩禮。尙披沖蘊。再列讓封。況普告官師。布聞方國。頗稽典命。未副眷懷。容略常讓之執。卽光外日之授。所讓宜不允。仍斷來章。

賜杜衍陳讓加恩命第一表不允批答

朕躬祠于郊。蒙帝之福。推爲慶典。徧第衆勞。以卿總秉中台。顯相大禮。謹有司籩豆之具。罄三事夙夜之虔。值功而賞。有國常典。何煩露奏。願寢茂恩。況普告于外朝。方驛騰于成命。便略牢讓。往服寵章。所讓宜不允。

賜杜衍第一表讓恩命不允批答

比虛右弼。以須駿望。卿清約忠壯。華皓一節。出入諷議。靡事不爲。挺然公實。見于有政。朕志先定。成命惟

行。況萬幾處可百職修理。朕所倚辦。卿宜知之。遽閱讓函。猥徇謙榮。且誕告羣方。不容顯辭。久曠台路。便廢撝遜。欽服寵章。所讓宜不允。

賜賈昌朝讓恩命第一表不允批答

卿曩侍經筵。已知國器。歷守京邑。則風績早樹。進領邦憲。則威名流聞。陽休山立。自處中道。朕以爲履正識敏。材任輔佐。引預機政。參貳台司。曾是踰年。休有成效。觀行則懿。俾謀則臧。斷自予志。冠升樞省。誕告百執。初無異言。猥露奏封。深存撝遜。況訓諭已熟。典命難淹。速卽欽膺。以光朝舉。所讓宜不允。

賜杜衍讓恩命第二表不允斷來章批答

向以戎醜尙桀。師伍留屯。公私乏匱。不可貲省。又官濫于外。吏欺于中。苛察過當。浮競成俗。濟水無益。治絲愈棼。圖所振整。未知厥序。以卿久在樞禁。習總事經。年耆識茂。盡瘁事國。是用選自予志。對秉台衡。藉敏材以康調發之艱。褒介節以懲進取之弊。朕旣寡德。方茲仰成。尺奏薦聞。能讓猶固。已嘗批諭。宜體眷求。毋煩費詞。早膺寵典。所讓宜不允。仍斷來章。

賜皇叔德文陳讓加恩命第一表不允批答

上帝居歆。億祉叢介。朕不欲專享。衍爲太和。遂差慶典之錫。均逮懿親之序。以卿耆德碩望。帥節王封。藩翰維持。宗盟磐石。已從僉論。俾進寵章。何需奏之遽聞。列謙懇而尤至。但自絲而綵。已告于朝。惟名與器。

靡虛其受。便當速拜。毋久留恩。所讓宜不允。

賜賈昌朝王貽永皇弟允良陳讓恩命第二表不允斷來章批答

褒帝勞旋錄功論賞。叶同輿議。肆舉恩章。卿左右有庸。授受惟允。尙牢所讓。涪露乃情。況朝冊久淹。詔文已報。當膺繁異之數。卽竚對揚之華。深體眷毗。毋致謙執。所讓宜不允。仍斷來章。

賜陳執中韓琦讓恩命不允斷來章批答

朕比執珪幣。祗事神祇。至誠所向。鴻釐如答。是以推衍天祉。沛流茂恩。徧錄侍祠之勞。悉從進律之典。卿卓有成效。協于僉言。而臨榮引讓。稽恩未拜。閱露章而旣熟。非公論之所期。便可欽膺。卽廢謙執。所讓宜不允。仍斷來章。

賜賈昌朝讓恩命第一表不允批答

朕聞元首明哉。股肱良哉。治之所隆也。元首叢脞哉。股肱隋哉。弊之所基也。惟德不敏。承久安之餘。淑慝混淆。紀律抗敗。思所以振弊興治。光輔朕躬。惟卿內挺剛正。外體和順。不疚于利。自時厥中。參陪宰司。則夙夜以虔。幹總樞會。則細大畢舉。爰立作相。用乂我邦。公言穆中。浩然肯叶。用擇剛日。誕告外廷。何徇光謙。尙崇至讓。沖懇雖列。允領已頒。毋執難進之規。速副具瞻之美。所讓宜不允。

賜賈昌朝讓恩命第二表不允斷來章批答

卿慮經王體氣陶天倪。挺處淄磷之表。不從燥濕之變。鎮定大事。贊襄遠猷。朕用希則。哲于前聖。俾實相于寡德。僉都輿論。亮成庶工。比程尙方之封。猶堅匪席之讓。況典策中出。朝野具聞。便廢道風。往穆台路。所讓宜不允。仍斷來章。

賜王貽永讓恩命第二表不允斷來章批答

朕以二陸雖靖。五兵未甦。總幹樞劇。實賴忠藎。以卿久副機務。用正使名。外詢諸朝。內斷于志。用降茂冊。初無異言。何執沖避。洊騰章削。況官以懋德。非可專辭。言惟作命。詎宜淹拜。便屈謙槩。往服朝恩。所讓宜不允。仍斷來章。

賜皇叔德文讓恩命第二表不允斷來章批答

夫先睦九族。後協萬邦。朕常夙夜。庶臻斯路。況卿信厚舊德。華皓高年。師學彌惇。懿行無擇。比詔王爵。未塞公言。亟進常伯之崇。兼易許田之輔。成命既告。有位具聞。何飾讓懷。洊列需奏。且茂冊備物。不可久停。孤風介尙。無容封執。宜卽欽受。仍斷來章。所讓宜不允。

賜新除皇兄允讓讓恩命第二表不允斷來章批答

卿風素詳劭。識理淹該。協綏同姓。預有成績。向啓王社。未極寵階。特視台宰之隆。仍增戶食之衍。涓日誕告。付外遂行。何列奏封。再執謙固。且作藩之屏。誼切先親。自絲而緡。理無中止。往膺冊命。卽斷來章。所讓

宜不允。

賜皇兄允弼讓恩命第二表不允斷來章批答

先親右戚爲國通規讓牢退易處躬常介向以卿雖列王爵未副眷懷申付將旄庶重藩屏再閱來奏殊昧所期況國典朝章不容停拜家情邦禮安得顯辭便略冲儀往諧茲授所讓宜不允仍斷來章

賜章得象乞罷第二表批答

朕以涼寡統制萬幾涉淵俟濟凜然祗惕是用擢卿俊望熙我庶工而謨明弼直早允羣議隱正冲坦自表素襟懿德所孚不仁胥遠朕庶幾同底于道克綏永圖而游騰露章來諉時柄已降諭答尙執所懷況獨行之高未足多美勿貳之倚何容執嫌當略謙言往安宰政孤風靜槩徒與嘉焉

賜郭承祐批答

朕以卿有初載之遇有離衛之勤毅然能力久而弗懈用建戎節率圖爾功告于外廷亶無異論何飾牢讓再列露封夫服謙冲語崖分治躬之偏亮膺名器建勛伐徇國之大方所宜欽副疇咨略去常執況師兵寄重河防事重董訓有經領護云劇毋淹定命趨服茂恩所讓宜不允仍斷來章

賜皇弟允良讓恩命第二表不允斷來章批答

向者公論大敘懿親緣卿王社申付戎節成命誕告多方普聞游啓讓誠尙執冲介況渙汗已出備物久

稽宜廢沖懷。時膺恩數。副予眷厚。卽斷來章。所讓宜不允。

賜皇弟允迪讓恩命第二表不允斷來章批答

朕敦睦懿親。差次寵典。年長者崇爵。屬近者尙恩。眷爾忠賢。用加節制。公言斯協。朝渙旣殞。何執常謙。欲遂素守。道風雖亮。允令難稽。往哉惟諧。毋或煩請。所讓宜不允。仍斷來章。

賜賈昌朝讓恩命第二表不允斷來章批答

朕惟師旅久興。邊境弗瞻。憊然日旰。靡遑祇寧。卿材謀有聞。政事已試。疾風弗偃。晦雨不渝。用加寵秩。回總樞載。至于轉調兵食。結納邊庭。伐謀授算。攸寄斯重。何徇常禮。再列奏封。以嘗敦勗。心難開許。往諧爾職。卽斷來章。所讓宜不允。

景文集卷三十四

頌

皇帝神武頌

〔案〕仁宗本紀乾興元年六月諒雪允恭七月貶丁謂此篇當是祁未登第時所作

或稱皇初之世。不賞而勸。不罰而懼。豈簡冊之彌文哉。議者云否。彼固未識夫震耀之飭天威。剛健之奮乾體也。粵若聖人制海內之命。據天位之尊。總秉權綱。章叙典憲。不有威辟。不足以震元慙。不有變容。不足以開至聖。用能消弭殄行。嘉靖多方。闡皇靈。憲宗軌丕天之大律。一民之至權者已。巨宋在宥。列聖繼統。際天丕冒。亘地砥屬。仆威械以去殺。襲道樞以訓儉。恩裕洪暢。容典飭畫。萬寶取足。合祛于皇極。百靈隕祉。震動于殄物。然猶右賢左戚。均權布寵。百辟箴闕。內平而外威。五紘在邊。番休而遞上。防檢來患。獨滌多辟。勲勲懇懇者。非弭亂之謂歟。然而善制未能無敵。有憂所以固國。迺者先帝違俗。羣邪濟凶。寄朝家之威。席鈞宰之貴。倖尙方以制器。狎神巫而締紱。乃至易守帥以漸醜圖。徙陵兆而投天隙。拂戾蜚語。恬有奸計。遂欲包禍心以竊發。執左道而干紀。餌梟羹以未盡。礪豺牙而密噬。神靈震赫。奸宄呈露。輔臣建白。醜黨震壞。赤車具獄而來上。凶豎伏鑕而前死。允恭事敗。先謂伏誅。皇帝陛下。深拱諒闇。覽照前典。重當國之職。慎退人之禮。詔曰。蒙宰之任。萬樞所係。今丞相謂自底不令。其上大司徒印綬。于是三事百

執抗疏以請曰。無將必誅。列辟經制。與衆共棄。常苦無赦。謂今所犯。惡不可聞。願襲天刑。以塞羣議。帝曰。朕不忍致于理。其放于朱崖。然後起跡。弛之臣。明枉結之獄。捨克之貨。輒上于官。附離之黨。肆赦一解。漏鯨蟄于網目。摧虎吻于市道。浴白日以升景。投紫蜺而霽氛。惡草絕而善苗興。清風翔而羣陰伏。人靈紓憤。道路相趨。旣而薦紳之徒。相與喟然竝稱曰。前日未命微梗。雙臣乘間。潛搆不類。陰傾時柄。食豔靡化。指莠待滅。陛下探觀時變。先斷宸慮。倚文母之聖。攬列辟之議。廉考剗殄。介不終日。未滅澄洗。蕩無餘災。定寶業極南山之安。殲渠魁易家人之召。智不回慮。惡未旋踵。事已決矣。昔滔天殛而虞功劭。流言放而周德奮。觀闕誅而孔制列。寶瑟價而漢基永。皆撥亂之盛準。長世之懿冊。所由來舊矣。是以烈祖二宗。墾舊防害。蕭勺衆慝。若彼之藉也。太后聖上。建威銷萌。祇遙先訓。如此之備也。宜乎勵無前之景鑠。暢不殺之神武。正春秋謹始之制。釋洪範作威之害。開賜無疆之肩壽。擢著不朽之尊名。此其時矣。蓋天子穆然初載。財成仰定。未遑論制作之事也。下臣僂僂末品。不足弦次新頌。輒敢述輿人之詠。簡康衢之詩。亦擊轅折楊之比耳。其辭曰。

眞宗御天。休息羣元。委裘上仙。茂功全兮。皇帝纘務。惟新百度。尙文右武。鴻基固兮。雙豎柄臣。矜權取勳。興妖放命。託禪神兮。上公列辟。協忠宣方。摧寬殄惡。清君側兮。曰恭曰謂。銜刀投裔。神武不殺。退以禮兮。或附或離。橫貸敷施。脅從罔治。董之威兮。氛開霞收。美澤雲游。荷天鴻休。德旣優兮。昭雪忠良。輿頌風翔。

實威舊章恤無疆兮

大有年頌并序

客有問臣曰。民生有本乎。臣曰。力田爲生之本也。王道有初乎。臣曰。養生王道之始也。客曰。方今表裏悅穆。上下充足。竝眎之瑞翔集。太和之氣浩作。億姓字遂。萬寶登成。震無疆之休。獲有年之瑞。抑此之由乎。臣曰。唯唯。有之。願客少暇。請舉凡而述焉。洪惟巨宋之有天下。垂祀六年。卜世彌億。道暢于不宰。澤溥乎無垠。御羣生之重畜。始乎兢業。治大國之小鮮。終以清淨。薰然化成之文治內。毅乎不殺之武治外。神禱蒙被。黔庶蕃息。格于上下。唐堯之允恭。及乎昆蟲。周家之忠厚。滿恩宣治。醴化普暢。聖人有以探天下之蹟。成天下之務。屏華處厚。抑未敦本。服絺衣以訓儉。黜拱壁而進道。碧砮文鉞。弗輸內府之貢。珍禽皓獸。罔充內闕之玩。齊官省三服之費。長楊罷周陸之侈。土事不作。無執扑之譴。木功不彫。有翦茨之陋。闢三面以弛罟。措底劓之刑。班十行而霈渥。懋景風之賞。足食去兵而信立。旣庶加富而教備。何則。薄來之財。易豐也。悅使之民。易勸也。較畫之法。易守也。無爲之道。易化也。若夫域民而爲之限。劭農而置其使。勤恤人隱。不冒海隅。候田星而建祠。謹農事而紀節。惟穀是寶。務實九年之蓄。經界旣定。式資什一之法。萬倉箱之攸積。俟禮節之興。一夫婦之弗勤。懼飢寒之至。不獮狘乎鳥獸。四靈以爲畜。不童竭乎山澤。萬物得其所。囹禁弛而駕往。海租免而魚出。備物優裕。嘉生報降。螟螣銷厲。畝澮流惡。崇朝之雲遂遍。納麓之雨

弗迷其豐年之祥。有如此者。仁博而愛。貌恭而肅。角民而不亂。木作而曲直。以正春令。禮大而易。視明而哲。徵事而不匿。火烈而炎上。以蕃夏物。義宜而斷。言從而順。商臣而不壞。金利而從革。以肅秋成。知崇而周。聰聽而謀。羽物而不危。水流而潤下。以畢冬氣。五隼不擾。四時丕廢。彝倫灼而可序。順氣凝以成象。其豐年之感。有如此者。昀隰彌望。鮮原相亘。秬粳粳而舉趾。桑閑閑而樹宅。邠子之稻咸藉。周兄之菽可辨。異畝同穎。有方阜之堅。一桴二米。無滅裂之報。地錯如繡。渠決成雨。多稼不害。著曾孫之謠。滯穗靡收。伊寡婦之利。田峻之饒迭泊。黃冠之蜡畢達。菽粟之衍。譬水火之可求。耕耘之速。若寇盜之將至。其豐年之獲。有如此者。事以中舉。斂以時入。鄭人無爭承之賦。澳倉有相因之粟。以實府庫。則錫予之用饒。以懷夷狄。則震疊之威立。以爲祿廩。則烝髦之士在位。以恭祭祀。則祖考之神來格。執萬國之帛。清明而會朝。按六龍之馭。彷徨而展義。漢復逮于鰥寡。周隰露乎老壽。戶與穆若之頌。民無蕭然之費。其豐年之報。有如此者。宜乎勤恁方穀。滋育毛澤。備乃庶物。美魚鬻之多。占于牧人。協旗旆之吉。四鬴羨食。九土相宜。生齒益繁。數溢司農之版。墾田彌廣。籍物尙書之曹。逢年之力在茲。草萊之歎咸弭。下令無壅。甚流水之源。惟民孔懷。思天保之報。畢曩聖之能事。總列辟之通術。雖甚盛德。疇以懿茲。蓋仲尼以春加于王。奉天之謂也。箕子謂王省惟歲。教民之謂也。至若祈年孔夙。方社不莫。探精禋之相盪。杏肸蠁之如答。非奉天乎。省耕以補不足。省斂以助不給。俗毆躋于壽域。人轉緣于南畝。非教民乎。古之王者。有一于此。尙或奮藝乎。

綳簡垂美于金刻。矧我后循而致之。篤而行之者哉。言未終。客乃避席而謝。臣曰。未既也。將授子四篇之頌焉。客其卒業。乃歎曰。昔之聞帝韶者。肉味都忘。語霸道者。謏詒潛愈。況夫鋪懿鑠之丕烈。訂豐懋之芬澤。懇苗除害。含甘吮滋。若此而已哉。而今乃知上德之難名。生民之受賜矣。頌曰。

一氣敷百華始。澤無垠。物咸遂。

右一章春頌三言。據木數。

南風之薰化以融。乘離司夏。火方中。朱明誕布。福來同。庶生茂豫。告成功。

右一章夏頌七言。據火數。

西顧沆瑒。素律凝秋商。含芬垂穎。豐楙登嘉祥。九圉清淑。祕祉播無疆。豆登祗薦。景福垂穰穰。

右一章秋頌九言。據金數。

霜降兮百功成。歲周兮庶績凝。富萬民兮愷樂。赫丕德兮昭升。

右一章冬頌六言。據水數。

景靈宮頌

〔案〕宋史真宗大中祥符五年。作景靈宮。仁宗天聖二年。奉真宗御容。此篇當是祁登第後所作。

臣聞。有開必先。大樸爲神器之本。率義而上。九皇爲聖人之祖。然則往來不窮之謂變。陰陽不測之謂神。其精甚眞。強名曰道。故其高出太虛。深際六極。冠三儀而稱大。亘上古而難老。帝鴻得之。升雲天。伯陽得

之爲教父。遙源寶系。接正統以延鴻。錫羨貽謀。啟靈心而孚佑。非天下之至蹟。其孰能預于此乎。眞宗文明武定章聖元孝皇帝之在宥天下也。基命靜淵之樞。繹思光明之懿。順攷古以遵妙道。聿懷福以禋羣元。雖有佳兵。不矜其忿驚。雖有拱璧。常寶乎慈儉。詔爵磨砥石之鈍。官惟其人。齋居錄賤星之囚。刑幾于措。絕金鑠。次農書。惠孤終。優老壽。彌文郁矣。監二代而可從。大孝熙矣。放四海而皆準。疵癘不作。寵綏有截。于是呼韓就序。竝會清明之朝。戊己撤候。咸羈荒忽之服。蕭勺四暢。粉澤交綯。旣而藥晨眞蔭。接乎常明之寶。蘭宇祕圖。流于主文之辟。援絕瑞。按秋游。縱雉鬱蒼之椒。奠繒堆堀之上。典禮之記三百。翕習而據容。神靈之封七千。昭明而受記。下之報禮也旣重。則上之降康也彌速。當其蒼水前戒。紫宙博臨。瑜然象載之美。飄如風馬之下。嘉夜四馥。順拜晬清之容。流霞載斟。躬聞聲臭之載。皇基遏悟。飈遊上賓。天子乃稽靈心。極能事。以爲誓誥所不及。則稱事裁典。故我金聲玉振。制儀號之當。天人之相交。必知意合德。故我鏤版藏鑽。爲積累之先。盡物之多。不足以稱德。于是總鴻鑠。薦高廣之稱。自外而至。不止于無主。于是度寶構爲密靖之都。則景靈之作。乃國家所以陳錫木支。優裕淳烈者也。故其測星廟之祕緯。卽珍坤之寶勢。鼙鼓不勝其樂。靈臺勿亟于成。宛延鴻紛。上軼倒景。靜深神麗。仰法太微。峙大衆之會。據神區之隩。煥若飛樓之十二。接層城而在茲。兀如神鼇之三番。負五山而不去。祕殿博敞。繚垣盤亘。珊瑚玉樹。恍陟閭風之顛。溝水蒲池。差勝渭陽之廟。採詩供清夜之誦。持節候神人之來。惟清靜之庭。以觀其妙。不攜

貳之爽以爲之宗。蓋天子穆然思所以獨烝上神。申固百祿者。又可得而云矣。先是上棟協吉也。倚雲筑而流睿唱。銀榜將署也。泚壺墨而霏仙翰。考室大備也。洽藻臯。晞蕭露。漢錢差賜。下逮乎門闌。周醪潑觀。徧露乎歌臺。此樂成之三物也。典領置使。咨于台宰。神靈標節。著之休令。六羽基德。五雲御歷。受民者十四姓。長神者三百年。則見于先天之紀。雲日衆變。天淵盈塞。郡國所上者數百千所。羣臣將順者千有餘篇。則存乎降聖之記。此昭荷之四物也。禘所自出。王者之配。益作原廟。大孝之本。于是竝詔方國。建天慶之祠。生民厥初。歆然著其盛。有物混成。寂兮爲之母。于是嗣薦瓊冊。推懿后之尊。典鑄尙方。摹瑑黃冶。作爲上帝之神寶。分鎮列郡之殊庭。此隆孝之三物也。若夫赤精下教。陰陽乎九宗。朱光以渥。遂開乎百世。事隔人理。故宮而不廟。儀參僊品。故薦而不血。禮有因造。事兼節文。則先聖御製贊載之備矣。恭惟皇帝陛下。奉承審訓。祗遙孫謀。允執厥中。純亦不已。方穀旣富。樂鳧鷖之守成。祕過不移。善春秋之順祀。方且載主卒業。見羹永懷。故卽位之二年。詔迓先帝眞像。于是宮建寶殿。以奉安之。其後再郊委粟之場。大合清廟之主。先甲而告。按齋輅以右回。肆夏之趨。飭卸金而一獻。又以見聖者之作。明者之述。周家之世世修德。復命武王。虞民之烝烝克孝。重協于帝者已。原乎萬世不毀。是之謂有功。非人所致。是之謂受命。五運迭起。雜霸德者。蓋斗精之餘。千載胥會。守天聚者。必盛德之後。我宋之興也。基乎溟滓。颺乎遂始。挾宇宙以制物。載降爲皇。絕天地而屬民。用佐于帝。及夫氣開于嗜欲之至。兆應乎精神之嚮。太祖經武攻昧。

躬文王之一怒。於變時雍。太宗執競題期。訓神禹之五事。莫匪爾極。故真考之纂大也。百度累盛。羣公交告。仁閔之監。臨我而無貳。博厚之寶。涌出而不愛。有積善爲之長發。有列真迪其凝命。屹神壇。謹馨粢。度九筵之堂。枚枚而有仙。瞻八景之馭。飄飄而下臻。聯壓神皋之奧區。震顯舊邦之新命。萬八千歲。俾爾壽而無疆。十有五王。靖我民而斯久。與夫漢纂堯後。立唐山之祀。而文獻不足。李出柱下。尊瀨鄉之宇。而獨恭不優。非同年而語矣。而臣濫首詞禁。躬閱瑞圖。猥奉方底之音。謬當成功之告。重念永定宸刻。冠映三辰之章。溫雒祕文。稗合五星之老。矧敢軋稽緩之蒙思。贊顯承之真蹟。烈皇墳之未揚。天津之大哉。姑述下武之欽崇。粗標底績之和會。至于奕奕寢貌。奚狀萬楹之多。縵縵帝容。但繼百工之和。躑躅流汗。敢次頌云。

於皇巨宋。得天之統。絕瑞雲照。繁祺山擁。福祿總兮。粵在三葉。虛晨夢協。青閣籠霄。朱文委牒。人神接兮。帝心祗遙。沛容善述。圓封累礪。奠琮侖栗。東風秩兮。道蔭孔彰。飈游下翔。歌繇悟飈。執競日強。命歷長兮。眞宗曰咨。咨爾羣辟。揚庭薦號。剝圭聯冊。首宗祐兮。眞宗曰咨。咨爾疇工。仰觀星定。大度瑰宮。罄爾邕兮。炳丹激射。飛仙圖寫。邃軒拖虹。回阿舞馬。表神舍兮。氈廟周張。瓊檠迪霄。雲旄芬樹。鰲案凝鏘。奠青場兮。天錫神寶。飛榮妙道。美鑠冶質。福庭分告。尊有昊兮。帝署嘉名。宸藻樂成。媧天鑲石。奎畫摹星。襲六經兮。兩宮纂服。上儀繁縟。不失舊物。聿懷多福。似以續兮。先聖不律。美假洋溢。消像頤長。棲神曲密。降之吉兮。

干施之旗。惟皇厥都。有龜而書。有龍而圖。沓珍符兮。五城宛延。館御列仙。淵然其泉。健然而天。且永年兮。

皇帝幸玉津園省斂頌

有序 案仁宗本紀天聖三年五月癸巳幸御莊觀刈麥此篇當是祁未之復州推官任時所作

臣聞六氣時乘。統以乾元之首。一游爲助。表乎夏家之諺。王者法順動以省民教。闢囿游而寓稼政。車輿每動。則攸徂相慶。侯我后之來蘇。羽旄載揚。則百姓欣告。庶吾王之無疾。厥有其道。非聖不舉。恭惟皇帝陛下。勲憊道甫。妥綏民極。斂武旌而匪怒。陳廟器以戒盈。湯既執中。周先登岸。際日出以丕冒。罔不維序。爲天下而守財。于以克儉。洪惟坤育之蔭。叶贊天元之治。繹思高拱。澹深淵以惟默。凝覽泰定。鏤清光而無際。麟題信厚之族。章敍于內。鷺羽羣飛之賢。夷儀于外。方木倉陳粟之屬。水衡見錢之多。又何以加。既富矣。簡則易從。有親矣。信可以紓散否滯。頤養精神。詔警蹕出入之嚴。慰臣民僥倖之望。雲霓大旱。鐘鼓飾喜者歟。若夫南直斗城。外敞琨苑。勵儲胥長楊之禁。均郊野近蜀之富。先時斥官塿之地。以收課穀。領勾盾之職。因爲弄田。每丘麥既登。原師至喜。則必按徐鑾之節。省斂穰之勳。因見三老力田。差賜百戶束帛。供帳留飲。極歡而罷。勤民之恤。累聖爲常。月惟蕤賓。日次東井。竊扈謹九農之政。貽舜告萬箱之收。天子樂由庚之得宜。間大昕之夙退。前除隱樵之道。右清連簾之落。官以辨物。儲不改供。于是廓霄宙。賓陽景。洞應門。引祕駕。短簾鏡吹。沸渭而夾引。師兵弩熊。隱鱗而軍裝。風清九九之塵。雲翬央央之旆。呼轡凝響。切神光而盆入。轂騎流赭。繞黃山而斜趣。蓋天旋辰正。以降于行在焉。觀夫周原砥平。漢醵雲荷。甸師

清野以獻狀。峻夫濂場而作勞。倬彼大田。是觀銍艾。饒乎南畝。遂成茨京。採來以識帝農之來。棲糧而歌東戶之泰。曩也昏作。今焉稻載。既而美恩下屬。偕雲而族。總氣相因。助風之薰。散遺秉爲寡婦之利。豐四鬴爲上歲之食。皇襟兌悅。帝暉日潤。乃詔環星之法。從普合需天之宴慈。帷牙九張。飲烽三燭。外饗獻麇。嘗之膳。太師侑日舉之奏。千唱萬和。自成萬天之歌。式晏以邀。竝拜鹿鳴之賜。懿哉是舉。可以推聖人之心焉。昔之重雍在辰。多歡作豫。則必大縱芡苗之獵。靡旃未還。多從外夷之客。過都輒賜。雪宮獨樂。不與衆共。鹿囿增築。虞其非正。陛下駿惠先辟。慎修思永。方且愆事之小。塞政之遠。獨紆神行。樂登歲取。因一夫之獲。恤下之有勞。推一穀之登。勸民之足食。豈徒燕出入以爲樂。自滿假而居逸。況時令之旣嘗新矣。先薦寢廟。春秋之不書他者。惟重麥禾。陛下上以薦馨嘉下。以勸耘耔。一出而兼二美。非聖人其能哉。若夫愛心自中。不待弦匏之感。至教廣運。無須家戶之至。況臣廁技儒肆。寓目車塵。道之不談。咎將焉執。輒次康衢之頌。庶知上帝之力。詞曰。

君之來兮。吾民休。僕如雲兮。騁玉虬。君之樂兮。我田良。積如坻兮。豐太倉。彼都之人兮。宴以喜。官扈民兮。無落事。自今以始兮。日益寧。禹躬稼兮。莫我京。

乾元節頌

表有

臣某言。臣聞至聖出乎千載。由旦暮之逢。升歌本乎百工。盛光華之唱。惟乃神之宅后。標載震之發祥。庶

物謝生。籲頌聲而樂正。兩宮介福。襲天算之萬斯。褒贊所先。承平爲盛。恭惟皇帝陛下。丕功建極。明度塞
遠。置方國于阜安。暢祖宗之純烈。南北郊之祀竝。薦于馨香。一二日之幾廢。忘于兢業。屬清和之戒侯。樂
化育以延祺。揭著神靈。題名節物。荷鴻休之長發。應禮享之多儀。公圭男璧以在庭。金鑑珠囊而備物。霞
凝壽飲。山立舞干。呼聲者三。與嵩神而協應。探策得一。示天極之同符。而臣叨迹下僚。欽聞絕瑞。愛心所
感。雖近發于和柔。峻德難名。詎周知于巍蕩。輕投倖曲。仰祝皇齡。謹齋戒撰成乾元節頌一首。

於鑠巨宋。茂德聳于四世。聖文睿武。仁明孝德。皇帝聰明寬裕。清和淳豐。擁羅圖付畀之重。奉椒極供養
之勤。玉色視大昕之朝。乾綱統萬樞之政。斗精布度。氣毋襲常。徹橫草之誰呵。措爰書之齋決。茨梁露積。
樂華黍之年豐。芻蕘往畋。謂文王之囿小。于是後宮無珠玉之玩。尙方罷蜀漢之器。避東多士。則自楚而
刈蕩。寅亮柄臣。則增堂而及陞。方且適寧先訓。總攬大猷。東面訪尙書之文。支日受漢家之奏。黎民納我
之軌物。百神據我之馨香。宿離仰澄。黃瑞湧出。于時徒歌者迷上帝之力。謝生者懷天保之報矣。粵若仲
呂鳴琯。炎官執衡。軫躔中昏。月魄幾望。元后誕聖之日也。先時有司刺經取制。援天叩聖。願以乾元冠于
節首。制曰。惟霄系駿發之遠。皇階錫羨之厚。重熙襲哲。朕與嘉之。況累聖之舊章也。盛典也。其每歲百官
効露囊之饋。福庭嚴蒲饌之供。內宮醴九行之觴。咸里上三服之貢。臣隣和會。黔細禔福。若此而已矣。臣
祁昧死再拜而言曰。夫天宰默定。生民而樹之君。帝期感會。出震而齊乎巽。且圖緯存必著之感。故神靈

無虛發之應。昔者電樞北繞，軒祖得之，以款塞門，接萬靈，潛虹下流，少昊得之，以官鳴鳥，卓五典，河龍出游，丹陵感之，法天以爲大，祿乙臨降，景毫受之，奮那而爲首，生民厥初，詩人推之，以尊后稷之載育，在震不憂，太史謹之，以驗文王之夙成，或赤光照室，卯金復四七之祚，或紫氣充庭，仙李兆本支之蔭，此可畧而道者，纔數十君，受命之難，不其然乎？至唐開元，有臣曰說，始建千秋之號，名爲白帝之養，爾時自謂訖休烈，倂景炎，作古于我，無慙來葉，然未有殊尤絕迹，震寤黎獻，可攷于今者也。伏惟陛下體兼二儀，精合五老，當履武之始也，至和薰于太史之瑄，及誕彌之期也，清瀾洌乎馮夷之宮，祥雲入房，神龍視浴，故生而岐嶷，握襁著其文，長而敦敏，甚德包其度，宥密而不敢康，功業以見乎變，及夫宅端命，繩假武，日出而天下明，風興而羣陰伏，成王訪落以謀廟，文帝銷志而求衣，皇矣上帝之監，一哉王心之協，九歌叙，四維張，然後顒顒印印，如圭如璋，以奮乎天子之光，議者述夫南訛之交，君嚮以治也，盛德在火，式乘其王也，炎精挺其命，則真人應其期，覆視圖牒之兆，宛如符節之合，天之啟宋，不惟舊哉，是日也，候華噉，闢層禁，積陽之雞三唱，雲龍之幄九張，樂羽芬庭，虎戟夾陛，謁者治禮，以次奉引，噦變皇紱，拱乎有定之著，襲玉卓馬，陳乎旅百之寶，夷酋委長，竭歡致福者，膜拜以俟，羽裳毳侶，續壽無量者，列奏以聞，肅然若百靈會帝于鈞天，翹然如十月朝漢之長樂，俄而呼鞭傳警，雕輦出房，神扶太庭之居，天臨絳屐之坐，上下臚句，內外傳傳，望堯之心若雲，慕舜之德如蜩，視不登軺，天咫于顏，一以贊下武之丕承，一以樂天命之陳錫。

薰風可馭。薄翠蓋而裴回。香雲攢柯。衛赤旂而容與。旣而人聲之歌作。堂下之樂奏。惟一二元老。上千萬
歲壽。誕育之慶。推于母儀。壽昌之算。還于天極。使聖人富而多子。三祝可兼。食天子日舉以樂。大平爲盛。
然後合需雲以賜法酒。晞甘露而宴諸侯。幣帛以將之。慈惠以示之。神鼈傾首之抃。王魚幸尾之躍。與下
同樂。克洽萬邦之歡。卒事不規。義陋六王之享。煌煌哉。嘉祚之鉅麗。橐飮之飾喜。非我后其疇離之。夫日
月不紀其初。則無以重寶精之序。頌嘆不布于下。則無以示王澤之深。下臣區區。敢忘斯義。其詞曰。
昊天之命。於穆不已。挺生我皇。赤帝之精。感乎孟夏。昭迪殊祥。惟乾之健。配元之始。嘉節允臧。上公拜首。
稱千萬壽。淳醴是將。帝謂三事。股肱同體。舉君之觴。百執和會。陽休樂凱。奉承親光。天乎悠久。地乎博厚。
我君無疆。

景文集卷三十五

頌

太一新宮頌

并序〔案〕仁宗本紀天聖六年九月祠四太一宮宋會要雍熙元年建東太一宮天聖六年建西太一宮此篇當是祁已改大理丞國子直講時所作

臣聞昔者宅命之駿索百神以徧祭降生之嘉鼓萬物而均福然則祀典載其羣族禮文領其盛節疏之則氣縱而靡震狎之則精攜而不物上聖于是揖歸運之孚佑倚太虛而參變慎齋精意洞洞屬旁求于幽闔燕蕭羹鬯芬芬苾苾烝進于馨香是以封君錯居守神靈者七千之廣蒙宰制用備祭祀者什一之仂誠欲異而不瀆建爲有極鼓舞至妙社合無垠以億上帝以庇生民者也粵若體粹亨之元奮希微之妙厥存主宰以司變化上驗祕緯之次總按萬靈之圖何言而善乎應象先而不爲老肇稱太一尊有十神毫忌啟奉祠之方天官著常居之記化截羣有輔蓋高之監文包幽室啓無窮之命疇祀恤而不昌罔匿神而能永若乃瑰宮奕奕轉砥而孔曼嘉壇崇崇藉廟而四合藥笈眞籍按循醺式草樓上士奉承蕭濯沃酒茅以示潔默牲饗而撤腥蒐三代之文有所未秩肇羣條之極制定其當質不及野儀不過物鎮神華以作固舉裨海而蒙祉非巨宋之善制疇克臻于此耶恭惟皇帝陛下高拱密清共規洪鬯得天統以播憲括地象而經野建大中之治陳之浹日訂丕承之烈肆于時夏尺一信牘重撫樹惇之鄉六齊

佳兵更鑄大農之器。回霜收電。而欽刑之恤。鍼疽委轡。而慎赦之數。合質劑以一度。同土炭以均風。捫箕舌而聖佞譏。擺倖指而黜纖巧。于是都人擯蹠嚙于贅聚。女紅後纂組于紕織。薪械美官人之盛。鱸魚蟹萬物之多。光明緝熙。上下充格。儒者之喙三尺。訥于抒頌。從臣之橐千輸。禿于宣美。方復澹然無治。幾而不康。可以震珍見怪者。罔不祈。可以蒙嘉獲豐者。罔不序。由是種祠舊時。悉領縣官。嘉幣偶馬。以爲歲事者。不可載已。乃詔建太乙宮于都城之西南。順禮文。介熙事。且言時也。先是。筮龜既同。天星既中。圭以溯景。臬以攻位。鎮沈輿之厚載。據神明之積高。審曲有經。倅圖中覆。陛下以爲崇奉真蔭。導迎祕祉。不可屈外府之財用。取祝史之辭忱。乃命損乘輿張飭。發少府藏。償其調度。因過更冗卒。覆將作善匠。給其員程。既而隴材千章。周版百堵。督墨爲雨。叩鑿成雷。法大壯之上棟。憲斯干之南戶。人不扶勉。工以雄成。未踰二時。大告考室。述夫祕殿。則崔嵬博敞。鬱律鴻紛。翠蚪齊首以負棟。海鷗龜尾而銜瓦。玉礪重荷。文璫四注。陽宗倒光以納景。陰祇濛霧而扶傾。犀塵不游。螟風無隧。乃有皇邸五色。黼帷九張。爲之真寢。乃有雲梢三素。綠輿八景。儲乎仙衛。甲乙異帳。辛壬殊秩。衆殿竝列。十座如一。煥紫宮之是環。玃赤霄而可挹。其左右。則飛宇回帶。修廊班屬。雲縈百層。芝栴萬狀。因其真畫之品。竝繪羣靈之跡。恍然覺神仙之可以致。肅然知鬼神之易爲巧。其前則藻局連觀。抗爲重門。樹松隱樅。表其馳道。揭示篆銀之榜。列坐鑄鐐之狄。所以震疊煇。照千祀也。其外則繚垣白盛。靈囿封殖。甘露騰文于茂樹。醴泉側出于陰溝。間以九層之臺。

五城之樓。榮曜偃佺。袂挹浮丘。所以範圍鴻洞。九清也。及夫膏肓戒旦。剛柔涓辰。祓惟淨之場。哀列真之對。于是乎水土和氣之實。玉帛二精之虔。沚毛紛旅。洞澈瀟灑。仙漿挹斗。香雲薄霄。像以鸞輅龍駒。器以鉞金華蓋。瑞祝發中而臨遣。使者持節以待祠。靈璫絳幡。導乎謁款。則盟而不薦。稽大易之象。坐工合樂。陪乎夜誦。則昏祠至明。采甘泉之制。高真竝享。啐福如儀。飛龍秋游以格思。肸鬯興作而歸福。數百千所。聊記符瑞之多。七十五來。更邁神光之異。猗歟盛哉。濬哲之能事。神明之鉅典也。蓋制作之本。我朝舊矣。始太宗徇史官之請。胥宇于國南。以開拜謁之館。今陛下按故府之法。度筵于都右。以斂集靈之庭。俯仰其前。不失夏家之舊物。陟降于上。越成周邦之新命。有由然也。夫神能專福。不加于鮮德。君能專祀。不殖于非禮。且如黜其刳血。豈爲穀觶之愛。而懿德改薦。遂介無疆之休。探乎祕經。不徇拘攣之義。而層構昭事。自成一王之典。捐金斥幣。紆執事之滯。而民不益賦。升壇奠饗。爲百姓之請。而過無移下。由是言之。寧不善始善述。雖絲衣其紆。高子誌星尸之繹。夢蛇下屬。文公作廊時之瑞。待我具五。始標黑帝之祠。嚮坐而拜。躬接高門之享。一何區區者已。下臣陶乃文之化。覲告成之蹟。固非大夫之能賦。實虞薪者之多誦。輒次輿頌。升之有司。其辭曰。

奕焉層構兮。鎮我都之夾右兮。我稽神宗之舊兮。

右一章

肅然上靈兮。戾我宮之靖冥兮。我據昭德之馨兮。

右二章

帝宥黔黎兮。匪孔禱之私兮。與神衷是對兮。俾物之阜而滋兮。

右三章

天眷聖皇兮。執周道之疆兮。俾君壽而威兮。配天之久且長兮。

右四章

藉田頌

〔案〕此篇是仁宗明道二年祁直史館時所作。

皇帝再紀元之明年春二月。率羣臣耕于東郊。恤愍祀祈豐年也。前此詔書示有司曰。自我太宗。襲熙厥功。億神裕人。宥命方國。肖翹跂行。亦莫不寧。永惟土著之本。民天之重。乃躬藉田。以倡農先。震地房之滿。管導改政之長懋。柔嘉令芳。于是乎孚。肸蠁鹵莽滅裂。于是乎復。敦龐穗滯秉遺。見糧如坻。我真考因其累盛。重以明德。故能步師百萬。狩醫閭。見武節。高世八九。升突遼。建元封。奉符隕祉。以據無極。肆余承緒。祇率厥典。則燕蕭布幣。固有常所。監農狎野。厥存舊章。惟一二執事。率循而懋明之。方春作時。百穀革始。姑使斯人悅羽旄之美。重見漢官。後嗣諗稼穡之艱。不失夏物。無贅聚儲峙。無煩勞供帳。趣合于禮。勸吾農焉。前期則修飭神壇。按除膏壤。夷道如砥。呼蹕填街。稍夔獮以護野。雜荆牟以守燎。阡陌繡錯。原隰龍

鱗。蒸膏冒櫟。協風回春。于是旄頭先馳。屬車齊躅。奔星舞于旗旂。行月棲于羽旆。壽犀注鎧。肅給乎師營。蒼虬範馭。秋游乎天轡。瓊鋤流景。金根照塗。帟幕周張。紈綃綽綽。旣而揉耒耜耜。載保介之間。先種後穫。靡播植之器。官分無諉。事具不教。天子乃以丙午之旦。升華輅。由大庭。顏行山則。銜枚無聲。龍虎見象。堪輿奔警。盆闔闔。切囿游。乃彷徨乎層城之外。五精來同。七聖景從。鑾聲佩節。次于帷宮。上旣瀉濯圭潔。儲思淵默。昧明。乃頓大次。款嘉壇。索先農以享之。因教稼以配之。血毛幽全。金石鏗訇。躬接妥侑。加祠官之一等。禮重沿襲。具祖宗之遺意。爾乃降靈場。儼先紘。物覩于聖。天健其行。星田彌望。紺轅儲駕。洪縻序進。玉步有容。三推成禮。邇臣告備。上曰。朕志在敦本。充其強力。旣可以勸。何憚于勤。遂推而進之。有司以義固爭。幾十墮。而後釋。乃始弭節容與。御夫觀耕之臺。三公羣后。班趨次耨。靡然從風。邁五躡九。大農灑種。庶人終畝。官師扞手。行內天旋。于時都人熙熙。駐望皇軒。或歌以壤。或擊于轅。不圖叢雲之旦。復見東戶之年。日華晏溫。天心憑豫。奉斗極。御應門。翔雞樹竿。墜鵠宣制。大賚四海。與之更始。虧除威辟。存問高年。振淹修墜。平徭闕賦。中外百執。告至而策勳。踐過三更。以差而賜帛。膏以解雨。鼓之巽風。不崇朝而周萬國。先是羣臣繹丕懿。潤鴻名。將琢之玉版。納于金匱。至是則回雕輿。坐前殿。震照儀矩。翕受典冊。皇哉茲禮。真帝世之希闊。臣工之旦暮者歟。儒臣學于舊史。竊明載芟之詩。甸師之職。在藉之義。有三說焉。一、典籍之常禮。二、籍履以親事。三、借民而治之。所言雖殊。要之。驅天下之民。棄耒而歸本耳。且古者。謹察天廟。

申赦陽官田之不闢。辟在司寇。作爲御廩。鍾而藏之。其故何哉。以爲奉薦粢盛。非無良農。不如親之愈也。課督耘耔。非無猛制。不若勸之善也。夫祭莫大于備物。物備而百神據之。兵莫大于足食。食足而四夷懷之人。莫急于豐財。財豐而有生聚之。是三物之濟否。在此舉也。且周宣缺之。戎軋其衰。漢文用焉。民阜其宜。唐后勤止。以豐易饑。洪惟太宗光迪于前。陛下述宣于後。皇矣同底于道。烝哉不隕其聲。方且九扈勤民。三事就緒。擬擬其盛。陳陳相因。糧餘可棲。草殖弗與。民一于耜。家萬斯箱。遂駕五帝。軼三王。奮甘實而搃馨香也。敢作頌曰。

倬彼鮮原。帝藉于田。匪藉其勤。我爲民先。悠悠春旗。覩士于畿。陽膏澤澤。邁乎三推。有壬有林。亦莫不祗。我疆我理。載耘載耔。實苞實阜。芾厥豐草。田畯至喜。祈年伊早。我穀用成。我倉既盈。我倉耽耽。鍾于東南。其用伊何。事神薦馨。爲酒爲醴。爲粢爲盛。蒸之浮浮。釋之漉漉。上帝居歆。降福孔休。降福伊何。我民既蕃。室家溱溱。三事不諼。食足武奮。震疊爾功。蠻夷來同。罔不率從。帝猷昭升。式于九圍。兢兢業業。以迄萬幾。在豐念匱。在飫思飢。子子孫孫。勿替引之。

陽郊慶成頌

〔案〕仁宗本紀景祐二年十一月乙未祀天地于園丘。祁時爲太常博士。此篇即其時所作。

臣某言。臣嚮者幸得以博士奉侍大祠。清廟園丘。恭導升降。伏見陛下接神措事。飭躬備物。暨夙夜。如不敢康。至誠上通。靈貺如答。肇出殿幄。而瑞霰先塗。齋款宗祏。而祥飈迎輅。景至之夕。步自帷宮。改衣雲

散。登壇月皎。收戢凄凜。煦如陽春。旂無蕩旂。燎無搖景。已事還軫。官不告勤。三靈洪洞。交相爲慶。滌穢蕩瑕。納于昭清。此則上帝所以顧聽。陛下所以欽奉。天人之際。不爲遠已。臣親覲盛禮。昧于知量。輒訂詩人之義。作陽郊慶成頌六篇。義大詞褊。無以游揚萬一。庶幾假畫謠漢。擊轅慕韶之比。竊用繕錄。冒昧以聞。瑰宮朝景靈也。屹瑰宮。帝下都。君來鑾。六龍徐。羽籥羅。金石揚。儼然進。薦嘉觴。靈之歆。肅陰陰。徧觀此。愴羣心。旣安坐。唼青黃。紛上馳。爛遺光。賁孫謀。永延長。

右四章三章章四句一章六句

我將禋禋太廟也。我將受命于祖于宗。洞洞翼翼。物有其容。物容備矣。帝心嘉矣。有壬有林。駿奔走承事。夜如何其。我不敢寧。萬舞洋洋。九奏備成。燎薰以禋。復降在庭。毛魚竝進。亦有和羹。帝酌而獻。工祝善詞。優然如聞。孝有餘思。神飲我福。弁胙而餘。辟公亞薦。就幄以須。禮成七祐。不敖不疎。徂來于孝嗣。福祿總總。純嘏以溢。我受爾施之。駿惠丕承。寶我大龜。

右八章章四句

校校祀事慈也。(案)仁宗本紀景祐二年詔奉慈廟巡莊獻莊懿附于莊穆之次故此云祀奉慈

校校闕廢三妣厥靈以肯柔德。(案)原本但篤不干有馨無錫靈而又薦我孝我虔物以志誠不在性怪貳簋嘉止百福蕃止無不成承以保我天子

右四章章四句

嘉壇合祭天地。侑以祖宗也。熙嘉壇兮泰尊。謨竝饗兮坤元。祖與宗兮侑純嘏。百神腹兮壇之下。千枝列炬紛秀華。微風蕩漾月金波。樂選寶物金石和。帝造新曲揚清歌。鬱華聯案醪品醕。馨聞既達封血陳。黍豆甘實薦蕭春。璧精粲粲琮黃楨。三垓升降玉鉤鳴。裴回常羊延上靈。至誠感通對殊休。諄勸此路符所求。燎龍盤空幣煙舉。天極餘歡篤純祐。紛紜六幕雲施普。

右五章四章章四句一章三句

南闕肆大嘗也。南闕爵連天。翠華此臨馭。靈心交胥靈。鴻恩思慶豫。琤璫上雞竿。龍重下鼙鼓。翠綏儼靡至。赭按軒霞舉。比屋僊子后。婆娑聲或路。滌穢天瀉波。崇朝解爲雨。束帛勞衆士。三錢發中庫。下蒙不貲惠。上錫無疆祚。俾壽萬斯年。南山均鞏固。

右一章十八句

垂鴻受徽冊也。惟帝垂鴻法上天。推名讓德紀初年。溫瑜祕篆金騰聯。涓成吉日膺鴻冊。申羽刻商謨。樂石冠劒相趨紛動色。帝徇羣心答天意。珠旒粉袞拜容備。丕休顯號光神器。功躋皇王黜雜霸。不自矜功無滿假。翼翼虔虔對天下。

右四章章三句

明堂頌（案）頌作于皇祐二年本紀所載祀明堂月日俱與此合時祁復爲翰林學士太常乃其兼官

臣某言三月戊子制詔季秋有事于明堂臣以太常與禮官博士詣垂拱殿議配饗事卽建言周有臣日且始嚴父配天仲尼是之唐并諸儒說竝祀六天帝不敢損陛下幸訪有司請如古便四月乙丑詔若曰夫禮稱情適文今議者言周唐則善至牽制所聞偏而不優宋亦一家讓不制作如來嗣何且事天不及地配父而遺祖朕甚陋之水旱不時羣神預焉今賴天之力方內以治朕能合饗天地以三聖侑朕報百神咸秩竝修況祖宗郊雩不爲無比有司無諱以勞務稱朕意臣伏誦聖訓久乃開曉以爲前古所缺羣臣不逮陛下獨得于心其所以事神訓人使萬世子孫無以加者至于作聲歌琢圭邸帳帟無文夜鑿弗嚴以竭恭致敬者尙數十物臣愚且不能徧知若今詩頌不傳是陛下盛德神功不盡主天下耳目聳動四夷聲隱乎無疆也謹撰成明堂頌一篇辭淺義直可使戶曉壤翁輶童皆得歌謳臣昧死再拜以聞頌曰

天有明命以聖付聖太祖太宗變伐大定誰僭而王孰擅而土左披右攘罔不就緒厥角在廷四夷無侮眞考顯承受報收成休休厥寧震震厥聲七十而五號以大榮皇帝纂武有庇于下兵囊不銛箠委而勿一農之饑吾飼以哺一夫之寒吾暖以褚日寬租徭歲貸囚庾協氣四薄順陽若雨原高隰下百穀騰騰二十九載惟秋九月迺卽大慶度筵度室寶字署顏震照多物置使有五悉詔輔弼既款靈宮亦享廟祐

天兵桓桓。羅列衛營。有闢有旂。龍輓螭衡。耳耳其驅。雅雅于行。旖旎連蜷。風舞雲縈。士若銜枚。驂牡不鳴。吉日辛亥。進祀于堂。衣畫袞然。環珞璫璫。六帝二祇。三后侑旁。醴酒牲肥。嘉饌鉅房。芼醢果棗。淨潔芬香。簞燾胖升。以迪厥嘗。我鐘欽欽。我舞俟俟。天妥于坐。百靈來序。奔精哆光。習霍層宇。山靈瀆怪。顯幽馳驚。或旅諸墀。或席諸廡。〔案〕此處疑脫一句。但文亦同。別無可致。姑仍之。有羶斯飫。相維辟公。既敏而度。帝拜稽首。柴烟上舉。祝有嘏言。皇帝受之。產百斯祥。哀萬斯臍。其疆如山。其積如茨。皇帝曰咨。朕不專有。且御端門。百執奔走。其赦天下。新邦之舊。矧乏錄勞。刮濯痕垢。官賞兵賚。金爵是富。驛歡四海。間弗容畫。天謂皇帝。感實火德。火德在孝。宗祀惟極。其還而功。卹嗣千億。而子而孫。長有萬國。天謂皇帝。安我羣元。投蜚斥螟。稼溢于廩。厲訖疾攘。人樂躑躑。皇帝眉壽。永錫萬年。前祀三日。區霧如閉。皇帝既齋。一夕而霽。六幘掃除。若埽逢彗。天清地晏。夜星騰晰。皇帝小心。恭與虔并。徧見神祇。拜跪送迎。久立于次。須樂之成。器必全玉。牢不愛牲。制爲諸安。以正和清。夜鼓徹嚴。敷致厥誠。明明皇帝。惟先訓是式。惇睦懿親。其馨如石。存問齟齬。容受譴直。振淹登峻。毋或失職。惟慈惟仁。不厲聲以色。皇帝有言。克己則興。豐守吾儉。尊捨吾矜。惟日之升。矍矍兢兢。無不此或承。

尉氏縣呂明府創修洩水渠頌

神州之地。積高于西北。而庫下于東南。尉氏直其坤隅。故上薄周疆。側負鄭鄙。汙瀆所蕩。行潦所趨。注我

西偏匯爲大侵。異時縣官往往募民開田渠入之惠民河。

今自江以北濬
漕總目爲河。

因灌淮楚人雖在勤水不爲害。

太平興國初或建言惠民河瀕尉氏折東而北地渤墊漏水多壞決迺西竝崇岡更開新道長隄右移衆渠咸塞于是水無所洩則沮洳淵淪鍾爲回淵每水潦不時必壞官亭漂室廬害膏腴之田千百八頃其大者則韓溝護軍二陂以名自達輪廣三十里他脈連股引延緣葦間溝遂之小小者尙數十百所匯民厥壤邑吏選吏蔽不敢聞歲趣其租人用重困蓋水留四十年狎爲常玩事窮而復理固然也聖上初元之年大理丞呂君長吉始爲政于茲邑旣視事卽按行堤閼周知其要乃嘆曰河漕中都堤不得弛陂盤善地水不容止潰陂注河則舟廢繕河限陂則農奪長吏不謀土其魚乎于是度楊橋之北累石編木以爲竇口規引積水潛出河下東因廢漚行七十里與惠民下復合水有所放漕亦無停君卽倅圖上言于計便甚事下丞相府復詔中貴人段徽明與襄內察按使者李識張君平等興作水工覈實程員無慮用材五百章礮斲數萬膏聖稱是工四千人度三十日罷條陳中覆悉蒙可報明年正月遣內侍臣譚好古領徒護作君參掌焉衆以子來匠以心競任器成雲環材若林不急不徐如期而畢以佚道使人故也二月渠成水下澆澗轉騰曼漢紆餘灑其沈災導其流惡數旬而牛馬辨經時而桑田復是歲耒耨所刺排水澤而居者蓋以大半三年水涸地沃畝率收一鍾流庸還占參倍于舊過是而獲者則不害矣于時和氣綢繆閭邦如春繞爲景風結爲油雲終古沈斥一朝茂殖昔之勞人今焉樂國夫善防者水厥之善溝

者水激之。因地則氣不蹙。達變故民不倦。惟呂君畢給政術。舉無後艱。肆水之走下而奠其歸。乘人之曹好而興其利。縣令之任。今所輕已。君而重之。敝政之改。衆所難已。君而易之。探古舊章。圖我新政。復地力。阜財用。民餽不愆。神精可懷。禦菑鍵靈。莫匪嘉績。朝旌厥能。秩君宮坊大夫。佐郡二千石。民去思者八歲矣。穀益以殖。年益以豐。億萬之口。并蒙厥福。旣而邑之耆耄。雜然共計曰。呂君功緒章章在人。其可歌也。盡琢金石以鋪其馨香。予從事于斯文。宜倫次輿誦而存其梗概。頌曰。

天畿之南兮下田良。壅流弗洩兮漂我疆。地環萬井兮原其谷。歲隲三紀兮租弗闕。我有賢君兮來何遲。累磻疏竇兮河之靡。注潢引汙兮渙東溟。鮮原畎畎兮農其耦。水反歲定兮黍稷華。捆載斯箱兮紛滿家。去我茲久兮田益廩。手之足之兮聲在路。何以報君福穰穰。明神所勞邦之光。樹樂石兮渠之旁。據德音兮永不忘。

景文集卷三十六

表

太常寺進案到鐘磬一部表

臣聞。鳧氏之爲鐘也。已厚則石。已薄則播。故以夤修之量齊焉。磬氏之爲磬也。上則磨其旁。下則磨其端。故以清濁之法制焉。是則器先利而音調。民已和而樂應。禮著夏歌者。實先于人奏。詩次商頌者。本依于磬聲。然後奮豫飾情。統同布度。盡韶之美。黜武之慙。諧下管以九成。絢崇牙而四合。聖期累盛。至範交修。恭惟皇帝陛下。攷古立均。披圖迎律。大猷翕作。韶象嘉成。推至樂以求音。本乎在治。願攸司之合奏。容有失傳。所屬以聞。發中垂可。特頒明命。俾攷正聲。臣等共率慙冥。仰祇推擇。昧阮咸識微之妙。非文收調啞之能。淹久日時。咨求典故。方且校堵肆之全缺。參宮羽之重輕。或鑪其銑鑠。均疾舒之所在。或鑪其鼓股。取擊拊之有宜。曩惟周臣。肇營律準。張絃列位。代管還宮。居有雅音。取爲定法。今已攷齊鐘磬一部。與律準之聲。悉無差異。七均有敍。九變告和。詘然能終。純如可縱。惟夫金有大定之德。石無可轉之文。苟二器應以克諧。則八音受而爲度。上符丕律。有煥懿綱。竊惟眞聖之朝。已嘗修正雅樂。舊章故在。年所聿遷。遺我成規。以啓淳烈。況今穆清多裕。聽覽餘閒。幸得樹羽充庭。睽人肄業。慮治音之有誤。巧善聽之所裁。庶

使靡靡遺聲。不容于五降。惜惜王度。來格于三神。永示方來。以於懿述。臣等無任霜霜于寶徽。切屏營之至。其鍾磬隨表上進以聞。

進耕田頌表

臣某言。臣聞王者必藉千畝。庸勸九農。載御綱于介間。脈陽膏于塵左。借民之力。時闢于甫田。爲神之倉。歲儲于馨稷。睿明在御。容典交修。茂遵文祖之規。遂庇陽官之舊。恭惟皇帝陛下。菲衣訓儉。重穀教人。乘春官之載陽。按大田而惟正。追循先烈。祇展上儀。綴萬騎于中營。抗九旗于先道。農祠訖享。神甸就耕。服黛耜以天臨。紆朱紱而身勸。本宜一壠。逐過九推。揭丕律以自新。冠前王而絕擬。自昔車牛馬耦。僅出偏方。鉤盾弄田。罔稽正典。訂茲之盛。曷擬于倫。臣陪列祠宮。宿官道室。竊興盛禮。敢廢徒歌。願因風土之餘音。少識樵蘇之談道。謹夙夜齋沐。撰耕田頌一首。干瀆宸扈。

賀乾元節表五首

(案)仁宗本紀。帝生日。乾元節。在四月十四日。

臣某言。伏以金魄就盈。龍杓建巳。紀爲誕節。允煥休辰。盡日月之照臨。祝乾坤之悠永。恭惟皇帝陛下。膺符受籙。出震體元。乘火運以興王。生正陽之令月。瞻萬物之長治。三光之庭。俗樂成康。刑措文景。梯山航海。咸知中國之聖人。就日望雲。悉禱後天之遐筭。臣滯守邊圉。徒詠聖辰。阻奉萬年之觴。但極雙鳧之躍。臣某言。伏以夏序始交。月靈幾望。儼明堂之朱軾。式煥帝容。紀華渚之流虹。用標聖旦。恭惟皇帝陛下。茂

熙至教通駿先猷孜孜厥心則九功竝敘烝烝其孝則四極爰臻混車書而極和塞天淵而浸福那歟之盛尙矣罕偕屬千載之應期固萬靈之輸貺誕彌有始延祝同寅九賓在庭殊鄰拭玉如山之委擁漢瑞而勿休侔天之剛冠義圖而彌永臣離邦未幾荷寵最深但傾景于葵園阻稱觴于冀圯

臣某言伏以帝出紀乎震方聖生符于里社揭爲亨會以懋洪休歷古爲儀適今尤盛惟長羸幾望之旦實丕后厥生之辰嘉序標名歡聲綿宇恭惟皇帝陛下奉承基構精厲憲章嘉祐順乎天時羣生庇于上德飭躬必儉令下弭奢侈之端禦戎以和納民于仁壽之地化孚無外恩浹有知每電樞之及期徇露囊而飾典大爲和會廣給宴邀指笏相趨交修于鉅禮呼嵩爲壽均祝于無疆慶運有華萬靈胥抃臣向陪近列今退私閤苦慙瞻之不良隔班綬之序進姑勤丹悃永固熙圖

臣某言伏以夏簫啓和辰躔幾望本聖生之初旦著天會之昌期令節垂鴻縣區交慶恭惟皇帝陛下丕承寶序駿惠先猷萬靈接乎馨香羣氓舍于仁壽撫不韞之服未始加兵獻又新之銘居常待旦化含無外恩激有知每屬電樞之辰胥抃露囊之舊大披路寢普見羣臣執玉奉觴罄歡心而如一後天經月續景算以無垠震動休符昭明鉅禮臣向陪禁闕今滯侯藩溯昕景之鴻階隔王宮之鳧藻姑勤抃祝永固熙隆

臣某言伏以帝出紀乎震方聖生符于里社揭爲亨會識乃洪休惟丕后克生之辰當正陽幾望之旦萬

靈輸祉。九寓祝延。恭惟皇帝陛下。膺赤伏之祥。據綠圖之會。天付所覆。罔有不臣。世貽厥謀。用侈斯慶。掩刑書以幾措。歛威械而就囊。物無天傷。俗致仁壽。謝生靡所。名德無階。是用企電樞之期。相與徇露囊之典。式披瓊館。或叩金祠。括輿地以投誠。後璇穹而歸老。呼韓薦幣。夷獠奉珍。雖舊而新。常茂居安之業。俾萬斯億。永膺昌大之期。臣久服內聯。今乘邊候。溯君門之萬里。隔觴會之九行。姑抃昌辰。內翹歡素。

正旦賀皇太后表

臣某言。伏以上朔攸開。微陽肇布。蒔月冀而頒歷。旅星柏以陳觴。恭惟皇太后陛下。教本至柔。道孚俾熾。贊天元而布度。包坤順以蒙福。方屆端辰。彌昭景祐。臣違顏左城。假節東侯。阻陪觀象之趨。但結干旌之思。

長寧節賀表

(案)仁宗本紀。天聖二年正月。以皇太后生日爲長寧節。

臣某言。伏以玉燭開年。協風播序。寶月上弦之始。祥沙啓繇之辰。著令有嚴。多儀云備。恭惟皇太后陛下。秉文駿惠。襲道至冲。肇百度之樞。用孚有極。慎五刑之誥。乃統至慈。皇矣而荷帝觀。隕然而示坤簡。屬茲善旦。爰紀聖期。訂千秋之舊章。擁三靈之丕祉。當陽稱壽。于以教孝于人。列辟相趨。于以後天之算。并包無外。蒙被大禧。臣久濫運行。近分優寄。睇日升而增禱。參鼂抃以無階。

賀壽星見表

秋分謹候。旦見爲常。惟明潤之成文。告壽耆之介祝。允丁至治。不應祥躔。恭惟皇帝陛下。駿惠先猷。寵綏庶物。敦仁而用錫爾極。深拱而罔測其名。新合三靈。震動殊祉。爛焉南極之宿。載于太史之占。視弧之前。踞內而出。騰華緯表。鑠景天垂。繫見象之甚明。屬攸司之奔告。聖期開賜。諒增千萬之遐。皇格重雍。方闡一平之盛。仍咨良簡。俾獲信書。臣等親遘嘉辰。榮觀美瑞。內循歡悃。實倍常情。

賀冬節表

臣某言。伏以寶典綫長。盛儀杓亞。步璧珠而聯景。挺芸荔以參萌。恭惟皇帝陛下。執競是皇。纂圖惟大。濟冲猷于堯屋。懿新德于湯盤。協氣順躋。慶辰昭會。方薦恭而欽燎。式擁瑞以如山。臣述守五符。阻陪萬玉。注遐情于望鵠。羨餘抃于歡鼗。距陌于茲。選言非喻。

賀生皇子表

〔案〕皇子卽鄂王曦時係慶歷元年。祁在壽州上。

寶祐叢休。天支毓秀。慶騰祕禁。歡溢中區。恭惟皇帝陛下。受命溥將。凝圖丕赫。權綱相父。根乎克念之虔。簡素所安。表于不勉之懿。且復欽刑薄賦。重穀弛畋。一方少饑。則急馳使節。方金稍乏。則輒續禁錢。民用靖嘉。神罔恫怨。是以上帝歆佑。三后顧存。詒美孫謀。昭衍無疆之烈。歸功元首。茂啓多男之祥。誕協仲商。挺生哲嗣。星弧具禮。天第交華。惟翕關之儲英。固覃訐而絕異。逖聆詔諭。竝仰獻饌。薦笏相趨。忭吾君之有子。珪璋流愛。宜天下之繫心。臣始去近聯。遽承吉語。賡歌繇臆。早知周德之遐。參祝祠祿。罔逮漢臣之

幸。

賀南郊禮畢表

〔案〕仁宗本紀慶歷元年十一月祀天地于圓丘是時郡在嘉州

臣某言。今月日。馬遞到敕書一道。以南郊禮畢。大赦天下。臣當時集本州官吏軍民宣讀。并下管內諸縣。寨施行訖者。帝饒訖饗。朝渙推慈。飛驛疾傳。庶邦叢慶。竊以天郊之重。國制有常。凡萬乘躬行。必三歲間。往不煩不怠。由列聖而持循。以妥以虔。合諸神而復對。睿圖累盛。緝典勤修。恭惟皇帝陛下。纂大合華。既中布度。抵金壁之玩。率儉示人。收霜電之嚴。措刑于下。克勵明德。格于皇穹。交熏太和。冒我羣品。顧懷時億。瑞應日來。亟藏上儀。若祗舊典。戒期百執。頒詔九州。曳雲罕之常羊。服翠蚪之半漢。殊庭一獻。清祐徧躋。遂自陽靈之宮。往會天元之旦。羽旄四合。峻陞參登。上璧左琮之華。合祛而信祝。祖範宗題之次。更侑而迭觴。拜嘉胙于席垂。烈欽柴于雲表。靈心合答。熙典備成。然後還坐中天之闈。普肆隨風之澤。改頒大號。崇冠初元。昭神之祥。祈命惟永。賞功赦罪。已責逮瘼。咸與惟新。牖民衷而遷善。聿懷多福。導帝社以縣區。盛際有光。彝倫咸賴。臣嚮觀舊史。殫見往朝。或不愛性玉爲恭。殊非明薦。或所過租賦爲復。蓋出重勞。語昔罕全。訂今絕擬。所恨清塵在望。自苦周南之畱。紫囊仍持。不與甘泉之從。第班恩諭。均浹歡悰。

定州賀南郊禮畢表

〔案〕仁宗本紀。保皇祐五年事。

臣某言。今月八日。馬遞到敕書一道。以南郊禮畢。大赦天下者。臣當時集本州官吏軍民宣讀。并下管內

諸縣塞施行訖。嚴燎煬薰翠輿旋軫。慶騰觀魏。歡浹黎苗。竊惟報本以誠。莫尊饗帝。就陽而祀。是謂因天。有國以來。三歲爲法。合萬靈而嚴享。窮四海以職來。乘茲治平。用舉能事。恭惟皇帝陛下。丕承正統。奄治中區。惟古與稽。有典咸秩。既揚明萬物。乃嘉享三神。前會諸儒。討定新樂。俄頒制詔。悉侑聖真。謂周以后。稷祀郊祖。而忘考。唐引睿宗配地。親而未尊。參對上神。自我爲古。推處大孝。卓冠彝倫。爰卜景至之初。克申躬見之禮。三后居左。自外止則匹行。兩儀位中。由天明則地察。蠡豆惟旅。簫石告諧。被馨德于神衷。委純祺于霄極。萬乘淵默。百禮休成。茂對剛辰。用肆大告。揭日破葭。注海濯癘。疊係有更生之歡。廢錮得自新之路。賞幣丘垤。屯旅藻鬼。歡驛疾馳。不崇朝而徧羣心保合。置天下于安。臣適護窮邊。阻觀鉅典。惟軍旅而未之學。久塵攝帥之行。知鬼神之所以然。方隔受釐之間。姑宣上德。明諭遐貳。

賀日蝕日降雨表

(案)仁宗本紀至和元年朔日庚午。日有食之。或祁在定州。因雨不見耳。

臣某言。臣所治定州并轄下州軍。去三月二十九日。雲氣晦暗。至今月二日午鼓。降雨盡酉刻未止。及尺以上。屬縣告足。臣伏尋近降德音。以有司言朔日日當食。有詔避正殿。輟膳改元。示天下自新。引咎太切。三靈震動。重陰蔽霄。日景不見。夫不見者。與不食同。臣誠喜誠忭。頓首頓首。伏惟皇帝陛下。纂成四葉。憂勞萬方。日月祗惕。罔有懈忽。辰晷回薄。大抵有常。今近推變異。厚自克責。天監在順。神佑者謙。感無旋旦。轉祥爲福。前此六月不雨。麥禾枯悴。及茲滂沛。遂冀有年。天完太陽。地茂多稼。君道尊安。旱災訖息。敵使

在道親觀感應。震畏盛德。抑伏紆謀。上推古昔。無今倫比。臣乘邊在遠。不獲與羣臣稱慶闕下。謹奉表陳賀以聞。

定州賀聖體康復表

〔案〕仁宗本紀。係嘉祐元年事。

臣某言。今月八日。得進奏院狀。報聖體康復。已于二月二十三日。御延和殿。親見羣臣者。六氣順宣。偶愆常裕。萬社交薦。施舍太和。便坐天臨。列辟鳧藻。恭惟皇帝陛下。躬甚盛之德。繼下武之期。悉攬權綱。罔憚宵仄。百度已治。舉器而置于安。一物未宜。無災而爲之懼。聽斷逾勵。頤攝稍愆。仙劑暫嘗。客疹俄解。前頒曠蕩之澤。邇會清明之朝。帝祐神扶。陽熙玉色。勤在謀始。雖有強不息之勞。福及報成。方介萬斯年之享。均乾宏冒。與日長躋。臣忝服近班。欣聆吉語。且念處無爲者。當簡于事。謂沖用者。莫嗇于神。望略繁幾。永光丕祚。

代中書乞降御製詩付編修所表

伏以國有大事。所以訓恭。帝庸作歌。是稱盛德。況且鋪棗天緒。頌嘆慈闈。宜首信書。以傳不朽。恭惟皇帝陛下。勤宜衆甫。祗建大中。澤浸有生。誼柔絕黨。遵端拱之舊。惟永樂之尊。教必有先。爰劭農而勸穡。古由我作。不愛禮以奉親。誠動天淵。聲震金石。因紆寶裘。申述盛容。據體要以成文。包猗那而同美。臣工廣和。方夏敷聞。華日月以昭回。被風雲而翔舞。臣等職當細績。親觀文思。聖典不昭。攸司任咎。是敢仰祈副簡。

垂錫書筵。揭爲大猷。俾永鴻烈。布之天下。遂抗于堯言。藏在山。永光于漢策。其御製耕田禮畢及觀皇太后恭謝太廟詩共二章。伏乞降本。付外編修。

代進新稻雙竹詩表

伏以層城仙籙。順勳于王游。區稻町篁。紛函于天施。仰趨中召。與覲嘉生。奉衢飲以屬厭。激蓬心而感發。恭惟皇帝陛下。勤勞訓道。開豫凝神。聯漢氏之離宮。有周家之靈囿。特侔滂浸。臨籍香滋。務知五稼之艱。式扈九農之勸。箭筈其茂。雕苑所珍。強幹挺敷。秀莖岐出。本至仁之普汜。萃靈物以旋鋪。警蹕紆行。臣隣拭目。樂崇丘之允殖。藹折俎以均施。內荷帝慈。竊推天意。一禾實穎。準歲取之且千。衆節共苞。示世支之維百。臣等共慙樛昧。適遭亨嘉。敢抒費詞。少陳大德。慶千齡之累盛。維以遂歌。愿五降之容彈。安能中雅。方塵辟覽。交集覲顏。臣等謹夙夜齋沐。各課成親稼。殿新稻儀鳳閣雙竹詩二章。干冒宸嚴。臣等無任省循。狂斐慙懼。屏營之至。其詩謹繕寫隨狀上進以聞。

景文集卷三十七

表

謝改待制表〔案〕本傳祁次當知制誥以兄庠方參政乃除天章閣待制在寶元二年十一月

臣某言臣伏奉制命特授臣依舊充天章閣待制者命發于中擢非其任懼先喪集感與愧參伏念臣早以憲冥陶于文教在阿蒙育易仕代耕由薦牘以應條齒經生而挾冊提給尚書之禮升直道家之山間屬成書亦蒙進秩不挹漿而持斗舉畏叨名未司牧而逢咩居慚何力仰含天造未委官刑猥濡墨于螭坳兼倅籌于鹽筴清光在望更無咫尺之遠至治丁辰時紀殊尤之事內修幸會疇敢越思迺蒙皇帝陛下錄以芻蕘記其狀貌慎行獎數超躋邇僚弗緣左右之容特出顯印之眷披霄延澍破蔀回光惟寶閣之神深祕珍圖之璧積創爲美秩庸佇惇儒寧茲僕遯之才可重清閒之地卑微驟列辭控無從昔之待詔承明陪游金馬無聞定著尙詫榮階詎比亨嘉之辰專爲顧問之選第驚茲授偶值無庸謹當佩訓白強飭躬思勉馳無泛駕雖千里之難期益靡望天冀一心而論報倘施涓壻敢吝靡捐

謝賜金紫表〔案〕表內有屬司容局云云當屬祁爲待制判太常禮院時事

臣某言今月九日蒙恩改賜臣金紫者戒塗近對綬品更華祇佩寵靈內深榮慎伏念臣行能無算孤拙

自知振鷺珍羣。居慙蓬羽。太官美食。遂嘆浮人。久含癘疾之愁。未獲酬恩之所。屬司容局。面控感懷。俄被句傳。曲膺蕃錫。袍文染蒨。魚飾垂金。服不值庸。忍慙于安吉。力微稽古。貽望于儒先。還綽無從。光軀何幸。斯蓋伏遇皇帝陛下。重隲常體。業置邇聯。特假身章。俾隆官等。庶奉稽如之賜。益圖叢爾之酬。

壽州謝上任表

(案)本傳。祁知壽州。即在庠。罷參政之後。爲慶歷元年六月。

臣某言。伏奉去歲六月十一日敕書。差臣知壽州軍州事。兼管內勸農使。卽于今月七日到任。禮上訖。初違侍橐。出總州麾。地控翰垣。政兼民稷。引章揆寵。處閣知慚。竊念臣本以孤生。仰陶上教。措辭簡斐。少不名家。投策猥并。遽叨署第。用沿仕牒。寢剽宸猷。匪智也愚。自知其天分。謂多而拙。罔待于人言。朝不汝瑕。誼無過廢。料于未至。靡有先容。次補者六官。乃正臺郎之秩。內遷者四職。遂玷從臣之聯。朝夕參承。歲時賁予。親逢云幸。平進罕階。故嘗晝昃亡餐。夜分置寢。算勞念得。則微橫草萬分之勤。計過悟非。則有坎壇一介之刺。內訟左數。寧舍靡遑。昧死聞陳。乞邦自試。書下丞相之府。久已見俞。筆閣承明之庭。茲焉獲遣。洪惟盛世。慎擇長人。申勗表乎詔文。共治形于宸歎。俯循極陋。曷稱敷求。此蓋皇帝陛下。善育人材。勤恢教職。謂屢經于策勵。審一出于忠愚。特委細文。俾臨善地。況楚疇沃衍。淮產夥豐。潛聖作藩。國封攸啓。元戎疏鎮。帥節甚雄。憬彼東南。此實都會。臣敢不悉心庀務。安節首公。宣諭本朝之恩。刺候斯民之瘼。冀逃譖事。姑服彝箴。但念夙侍軒墀。未嘗去國。自同犬馬。寧不戀君。魂棲交戟之嚴。心結觚稜之遽。儻使賜環。

仍在踣履終收。則奉計來朝。敢三年而憚遠。省躬論報。雖九殞以猶生。感惕自中。涕洟橫集。

謝書目成加階勳表〔案〕晁氏讀書志崇文總目于康定二年告成。祁亦預修。同加階勳。是年十一月改元慶歷。康定二年即慶歷元年。表內有中請爲邦誨。是祁時已出守壽州矣。

臣某言。月日。進奏院遞到告敕書各一道。將授臣朝散大夫。依前官加輕車都尉。封賜如故。仍放朝謝者。祕錄終篇。鴻都第賞。例霑微數。垂料餘勤。授受交虛。榮憂兩萃。竊以廣內之奧。中經所藏。自四聖相承。凡七紀而遠。積丘山而盡在。樛朱紫以未分。金匱深嚴。牙籤叢舛。攸司傳失。有詔部分。疇簡名才。總製都目。體漢家之流略。概見所從。參史氏之藝文。種分必類。討論既定。統紀悉周。而僚輔他遷。纂修交集。臣猥緣懵學。俾預末行。素自慙冥。動咨典領。雖片詞殘牒。時竄左文。且雜語諸家。尙悉全載。訖慙數職。中請爲邦。遂專刀筆之煩。益忘緹油之習。不謂芸編卒業。黼幄程文。嘉衆籍之有條。美諸儒之競力。因褒邇列。施及孤臣。聯文散之近階。賜朝勳之優轉。揆榮至渥。撫已無堪。閣筆居多。早戢鍾繇之恨。殺青偕上。敢叨劉向之功。汗漫不收。天高難訴。但能銘于肝膈。或論報于涓埃。愚疑不誣。明神是實。

謝加階并爵邑表

〔案〕仁宗本紀慶歷元年十一月郊祀。加恩百官。祁時在壽州。

臣某言。今日。進奏院遞到誥敕各一道。特授臣朝請大夫。依前官仍封臨洛縣開國男。食實封三百戶。勳賜如故者。緹儀交展。信賞第頒。綠策從勳。汎濫異數。罔功被貺。尸寵蒙慙。竊念臣本以屏羈。誤膺識拔。

雲章乏使。荷橐見收。束帶而奉朝趨。居常三省。戴盆而仰天極。決匪兩能。止竭樸愚。以圖稱報。寸勞未効。公議過興。出屏近藩。尙通祕籍。適會于郊之享。爰修以職之虔。法有侍祠。雖預甘泉之簿。身方守土。遂阻玉關之歸。負結戀深。心馳魂震。迺蒙皇帝陛下。廣歆馨之福。推舍爵之仁。疇庸以差。均澤于下。眷孤臣之補外。助經入而有常。錄此餘勤。沛爲慶典。進階越等。啓土肇封。聞命若驚。修顏罔寘。且掃除奉引。未始請行。而於穆猗那。無從抒嘆。坐沐光榮之集。例承深潤之褒。難拒大恩。姑銘丹臆。儻云酬之有所。誓至殞以無忘。

陳州謝上任表

〔案〕續通鑑長編慶歷二年右僕射張書以魚周詢奏于七月丁亥判陳州九月甲申徙壽州書自陳徙壽故祁自壽徙陳

臣某言。月日進奏院遞到敕書一道。就移臣知陳州軍州事。兼管內河堤勸農使。許辭謝。取便路疾速發赴本任者。容慈垂濟。羈僨見寬。許停遠方。俾守近屏。拜命云已。感涕交沱。臣卽以今月九日。還付故章。假領新節。恭趣便道。罔敢畱行。以二十五日到任。禮上訖。眷茲宛丘。陪邇京邑。譬周寰內。均漢右扶。氓俗敦龐。閱盜稀簡。臣旣與吏民相見。卽告以朝廷撫育之厚。鄉縣期會之常。最厲惰勤。整比綱目。況穀食豐賤。閭里阜安。儻謹奉條。稍畱考課。雖臣庸賤。保致靖嘉。伏念臣比荷簡求。擢在親近。業以狷直。初無援私。寵靈設加。倫比驚媚。臣亦知險塗易躓。孤枿難林。尤避讎嫌。居常寢默。冷司閒局。自分歲時。寸割片文。不干臺省。冀緣謹敕。弗累採收。然飛語無根。狙轂潛擬。倏違法從。外典守麾。倉卒去都。靡遑自辯。問關居外。謹

肯爲言而譖不亂聰。昧果蒙照。未踰再禩。俄及內遷。幽荻賜萌。朽骼蒙肉。城闕在望。頓比玉關之歸。傳瑞交華。決非淮陽之薄。抑臣又聞。簪屨至賤。所收本乎君德。狗馬何預。所戀在乎主恩。物誠有之。臣可無似。敢不勉懦爲力。旣力而忠。竭肝膽之愚。基分寸之責。生年死日。質聖誓神。疏屏方虔。造朝云阻。躬畱心企。感悅叢并。

謝替赴闕表

〔案〕本傳。祁由陳州遷知制誥。時係慶歷三年。

臣某月日。都進奏院遞到敕書付臣。爲差宣徽南院使保靜軍節度使王德用判陳州。令臣候交割訖。發來赴闕者。節音垂召。詔底前頒。弗棄而收。釋憂爲忭。拜恩匪次。戢感無涯。伏念臣本以空疎。誤蒙記識。課勞未驗。竊寵已華。遂自史員。人塵禁閣。水淺舟膠。勢有必然。馭拙吻傷。理無容濟。果煩正議。將責罔功。伏遇皇帝陛下。廣覆由天。至慈如父。謂樹立之始。實出羈平。雖進擢以來。不由黨授。排讐擯刻。屈憲回仁。俾千石以出麾。促萬分而自贖。甫踰年律。特改近藩。墜葉重春。摧輶復載。會須輔鎮。將授帥臣。因得代還。以圖收齒。聞命歡踊。撫己震慙。且念蕞爾孤生。覩然去國。長而多病。衰不須年。鬢雪紛斑。目花眩黑。越在遐外。積有流憂。尙恐狗馬道窮。先填溝壑。江漢天限。無復朝宗。敢期踰屨之餘。倏被召環之賜。光華下集。首領生歸。威靈改加。殞越奚報。但念九閭杳望。十舍而遙。雖否運已傾。決無終塞。而清光可仰。敢俟駕行。甫訖交符。卽當就道。欣榮參會。濫訥難宣。

謝知制誥表

〔案〕表云三月詔書乃慶歷三年之三月也。是月蔡襄除知諫院。那有制詞。見本集。時那年四十七。故云。臣論強仕者六年。

臣某言。伏奉三月壬辰詔書。授臣依前官知制誥者。有命自中。無階申讓。怔忡即忝。感惜交顏。竊以星署嚴華。是司書贊。帝猷粉澤。專寄彥髦。故言之簡煩。視人之賢否。比綸而演。如汗弗收。絢日星而森垂。薄天淵而充塞。號爲盛選。宜值難才。伏念臣天畀以愚。學陶所習。本緣薄技。倫比諸生。待罪文林。薦紳朝笏。預成六典。見謂少勤。因得點筆夾階。注言于左史。前籌倖府。商利于縣官。會臣兄某。越自禁局。擢貳公府。伏蒙皇帝陛下。憐臣淹久。記臣樸忠。方以避親。尤難試可。天語宣示。台宰具聞。遽內交戟之深。實兼待詔之美。此爲異等。絕駭常均。遂使羣議坐譴。夸者陰媚。得無忌克。時浼聰謀。蔀屋夜脂。觸太陽而銷散。幽萌朽枿。託厚地以兼容。迭爲二藩。不遠千里。而賜環垂洎。趨節生歸。不圖誤恩。復齒中禁。荷寵惟谷。捫襟若醒。且臣踰強仕者六年。廢辭業者三歲。慮窮刀筆。氣耗風波。壯爲病侵。衰先老至。任焉不稱。謗又將興。矧今鸞鴻簞庭。蘭蕙交晚。檢之禹律。粹以唐文。慶霄光明。萬物丹采。安可細事菅蒯。廁之色絲。歎揚糝糠。先乃嘉穀。撫孤生之匪次。寧樂育之當然。此蓋陛下先置不能。以來多士。罔遺篤物。庸示至仁。策十駕之庸駑。班四戶之凝近。上循感會。俯視官箴。敢不勉情爲虔。拂晉于瞭。浚明惟恪。絜矩以須。稍裨慎令之行。冀免知臣之謬。臣無任循榮抃遇感惕屏營之至。

謝轉吏部郎中表

〔案〕本傳不載此職。又歷代名臣奏議。自慶歷三年。那爲尙書禮部郎中知制誥。上三路防邊七事。本傳亦不載其職。今據表內諫直禁殿及直銜耶靈之進。跌云。

云似纔在知制誥之日。
未授龍圖直學士之前。

臣某言。伏奉制命。特授臣尙書吏部郎中。依前充職者。課容歲比。官得例遷。華秩誤躋。愧襟罔措。伏念臣本緣羈遠。誤直禁嚴。病與生俱。衰先年至。間抱風波之悸。實依山藪之藏。牽勉拙艱。婆娑歲月。攸箴未驗。不職應誅。敢圖公府之暑年。直狗郎臺之進秩。報聞既允。付外遂行。拜獎綵以驚魂。躡華塗而抃股。此蓋皇帝陛下。天無擇覆。春不檢和。謂陟明之格普頒。且宿業之勤必錄。遂容孤蹟。亦被優除。謹當澡雪而煩。彰施厥采。和羊腸而叱度。觸雞雨以長鳴。苟昧是言。有如茲日。

謝龍圖閣直學士表

(案)本傳。祁以龍圖直學士知杭州。留爲翰林學士。此與後一首皆在慶歷三年。

臣某言。今月四日。閣門拜受官告。敕牒各一道。除臣龍圖閣直學士知杭州者。層禁叨榮。大邦蒙委。恩叢非願。愧溢乃情。恭以聖考上文。寶璽肯構。大開天策之蘊。分置金匱之藏。間召名儒。入當清問。因璇題之華構。冠學士之美銜。粵爲峻資。罔非崇東。如臣者。器資樸昧。學術迂孱。幸有親逢。記無報稱。四年待詔。姑奉凝嚴之游。兩郡佩符。不結循良之目。賜還邇著。俾演大言。扞格衰齡。尙綿宿疚。胡廣不愆之舊。動輒有忘。左史能讀之書。舉皆未學。茲焉弗職。況也自知。適會要藩。慎求缺守。宰司誤啓。制詔聞俞。既籍內于神深。又節假其蕃翰。誼非輕外。治實責成。目見河圖。遂過宜尼之願。名留禁闥。更無汲黯之嗟。斯蓋皇帝陛下。續短于長。勸能以否。謂雖一介。自有鳴吠之專。借曰萬分。亦收涓埃之補。庸加拔拭。垂逮未愚。敢忘夙

夜之恩以忝身修之永神而可質心不難銘。

謝宜召入院表

右臣今月二十五日翰林書藝董皓至臣所居奉宣聖旨召臣入院充學士者驛使猥臨天辭垂諭齒收單跡引內禁林列讓靡從實顏無所竊惟疑密之署誥命所司朝選慎其咨俞士類託乎清切非有羽產之懿嚴徐之才曷以對揚運言傳爲成訓衍膏潤于方夏鼓笙簧于典謨是惟能賢足暴公議伏念臣懦冥素稟蹇拙衆知偶緣雕篆之微久被菁莪之育親逢聖勝自力攸箴有事素風遂安所習向從青簡之列越綴皁衣之聯縹緲爲邦賜環上計入陪星掖祇演縉詞而扞格長年尫劬槁質故疴新疹痊劇相尋淺學空文廢忘幾半間伏蒲而自乞願剖竹以再麾遽沐俞恩仍遷近職天誘其願人及爾私方具扁舟徑趨守屏不謂玉堂任缺寶詔中畱還駭栗之飄危補持荷之空乏卻其訴避敦以恪居旬歲內而三遷實情涯而載惕此蓋皇帝陛下過循虛譽降飭孱姿枉頒召節之華俾蹈高門之複歛躬圖勉揆獎思酬誓以澡祓蒙心釋求不律體齊人之編棧謹迪身修探義易之隨風慎裁憲令萬分可采九殞爲期

謝兼侍讀學士表

(案)本傳祁從審官院兼侍讀學士表內云自去歲收還郡符是時當爲慶歷四年

臣某言伏奉今月十一日制命授臣兼侍讀學士者命由中發職匪次加揆寵自簡無顏容愧竊念臣天賦愚樸地託羈單去歲中收還郡符引內自禁以多病之後乘早衰之餘昏眸眩于臨文倦舌吐于論事

而堯章煥日漢律丕天形過照而自窮馭已鉤而必蹶方將免冠頓首自劾曠僚託迹塵纓復從冗職何言大度併赦弗聞遂令散木之流獲預複門之祕恭惟上德稽古至聖多能當決事之少閒託不明而訪逮尤須練達上副諮詢詎容孤生遽謬高選何以披文玉版隨句清廂覘師尚父之書尊其爲道觀太史氏之策知所以王匪曰值才居然過聽此蓋皇帝陛下愛同芻狗冒若陽膏方詭效于寸長不殫能于再割遂令鰕質進爾清光誓且窺管于天自涔而海漸識三墳之大稍知二首之疑俾免多言是酬洪造

授龍圖閣謝恩表

〔案〕本傳庠復知政事罷那翰林學士改龍圖學士庠復參政在慶歷五年正月

臣某言伏奉制命蒙恩特授臣兼龍圖閣學士者停直複門徙恩層閣本緣親而自乞蒙引籍以對除揆寵兼常無顏容愧竊惟先聖有作叢構實興鬱律辰居之嚴璧積霧圖之廣踵華創職稱是取材肇允榮塗何嘗輕授伏念臣識庸庸淺術學膚屏入忝玉堂間陪講殿加以樸忠無飾孤耿自將附湜湜于涇清守鑿鑿于雨晦賴天燾熙曠日保全適以臣兄庠召自外藩復參大政理所宜避地不處嫌稽首請閒素言敍懇丐上還于禁籍得專侍于經帷伏蒙皇帝陛下見謂由衷特從換秩罷茲要近處以清閒拂怡儼之塵容應螭蜎之寶宇伏況臣出入三歲便蕃五遷四叨學士之名罕見從官之比雖素領焦禿病軀尪羸器極斗筭之容利止鉛刀之割尙當勉懦爲立續短俾長尙有補于涓銖矢不忘于隕跡

謝復侍讀學士表

〔案〕本傳那以張貴妃事出知許州甫數月復召爲侍讀學士表中止停嚴直猶屏大藩嘗未半莽亟頌成命正指是也張貴妃事在皇祐元年又慶歷八年五月

庠爲樞密。祁復爲翰林學士。此時祁當有一謝表。今集內未見。

臣某言。今月十八日。馬遞到官。詣敕牒各一通。授臣依前充翰林侍讀學士。仍放朝謝者。左符待罪。方儆常箴。中制疏恩。遽還近職。祇前尤之。詿謬。監來寵之。便蕃撫已。銜榮無顏。容愧伏念。臣福祚單狹。性局憲煩。距躍至愚。坯陶上教。因隨士夫之課。謹修官學之方。入直文林。進簪侍筆。從鷄翹之游。豫備虎觀之討論。薦許爲邦。俄蒙納節。序躋天掖。祇演王綸。再忝複門之游。久奉華光之學。至于刪定條約。豫法家之議者三年。整比京司。牧縣官之財者萬計。止貪云補。罔避謗囂。仍因擿句之閒。嘗逮邇言之訪。質當今之謂利病。靡敢腹情。語前世所以存亡。或蒙稱善。以孤遠之質。荷顯印之知。播于傳聞。寧無妬媚。何者。一金被賞。來衆口之毀銷。寸的取褒。啓百夫之決拾。名盛難處。援寡易危。況復因希闊之儀。抵忘誤之禁。緣爲飛語。遂浼至聰。所賴公議原情。眷慈合垢。憫一眚之失。義有相除。在三赦之科。愚最無害。止停嚴直。猶屏大藩。曾未半基。亟頒成命。舉已除之籍。復署禁扉。慎數易之宜。仍畱州闕。孤心按堵。蹇步良行。此蓋皇帝陛下。養以至仁。納之大度。忍令久棄。俄與自新。冒陳櫬以流膏。破幽盆而逗照。故綏更飾。足追露冕之矜。新組交垂。遂免寒灰之辱。況臣素探前載。粗識大方。謂事君之盡忠。不忘于外。知獲罪之無禱。有私在天。水雖折而猶東。石可磨而弗撓。謹當宜明厥守。湔漑爾疵。夙夜匪告于勞。淄磷不昧其節。河湍日皎。有如自誓之言。弦勁韋柔。參服攸聞之戒。獲收涓效。歸報洪私。

景文集卷三十八

表

讓恩表〔案〕宋史仁宗本紀皇祐二年九月大享天地于明堂殿今據表內欽柴已事滿露函禱及進三品之美階加八柱之榮數云云蓋即讓進封常山郡開國侯恩也

臣某言欽柴已事。湛露函禱。叨預祕樞。均推渥典。席恩徽之累等。捫心極之有涯。敢援訥辭。啓停蕃錫。竊念臣久塵幾綽。無補顯猷。仰就德以日躋。罄小心而昭事。惇崇秩禮。震動殊休。歷款先祐而遂見闕宮。哀對上靈而升侑文考。光華接于旦暮。汪濊塞乎天淵。內慙衰殘。法當侍從。稽如進揖。寧善于魯儀。肅若動心。但欽于漢瑞。獲紆不敏之咎。已銜大庇之仁。敢冀睿明。首褻機管。錫之崇號。訓以懋功。進三品之美階。加八柱之榮數。靜言匪服。祗足增慙。且夫禮行于郊。孰非展采。勳在于策。斯可歸勤。苟曰罔功。率爲不稱。矧當三接之地。尤寄百度之宜。寵旣自叨。勸將何有。伏望皇帝陛下。矜立志之難奪。靡間于匹夫。察過令而必收。罔論于渙汗。丐還虛授。庸息羣言。叩善聽之彌高。露危情而偕極。期于從欲。是免濫官。

謝覃恩轉給事中表

臣某言。伏奉制命。授臣給事中。依前充職。進封常山郡開國侯。加食邑五百戶。散官勳如故者。休成感祀。恩賚庶工。錄臺範之少勤。枉帝緡之平施。進升官著。申衍侯疆。榮雖例加。愧實中積。伏念臣性分疏拙。學

習空虛。逢時盛明。與衆倫比。向塵詞署。自抵禁條。嘗從解籍之科。亟沐賜環之召。老馬無棄。姑結戀軒之勞。檻木未殫。已辯代檀之誤。專陪勸講。彌邇清閒。居嘗刻肌坐。或忘食。以爲鍛翼方奮。勢不高飛。折足始痊。誓無疾走。冀保全于晚節。慚云補于厚恩。會國家推攷上儀。懋竣宗祀。福不專饗。澤乃普頒。眷鰥薄之孤生。忝光華之旅賁。瑣闥增秩。望郡陪封。追論講求之功。適當容典之局。禮有因革。皆中詔自親其文。議或糾紛。故上心制定其當。合任臆官之咎。顧偕躋等之遷。此蓋皇帝陛下。德暢多方。仁包有截。和氣中律。庶彙竝甄。太陽垂光。萬影同見。遂令羈宦。豫齒褰章。步區舍之重深。食戶租之優富。罔功被賜。誠無獨讓之階。累日儲勞。願補他年之最。涓分可効。糜殞爲期。

謝復兼龍圖閣學士表

〔案〕本傳。祁以祀明堂。遷給事中。兼龍圖閣學士。今集內表謝兩次。必當時亦兩次加恩。本傳統言之耳。

臣某言。臣伏奉制命。授依前給事中翰林侍讀學士兼前件職者。恩洗曩愆。寵還故授。緣榮得忝。顧忝成慙。竊念臣識局慙冥。學機扞格。久塵法從。再直禁垣。謬誤臆官。徬徨去國。遽援之老。何止于知非。石建之愚。自甘于抵死。永言孤跡。俄軫上慈。外停刺史之符。入引露門之籍。用是晝分忘饋。夜艾輟暝。收擢短才。詭成來效。報深恩于骨肉。掩餘誚于防川。伏遇皇帝陛下。修祀合宮。均釐環海。幸參圖始。汔覩告成。普賚侍祠。例蒙扶秩。尙念過雖一解。職未盡歸。再紆泥綽之褒。仍廕霧圖之祕。儋膏沃朽。破蔀延暉。豐駕復騶。漸習安行之謹。傷禽已奮。益懲虛墮之虞。敢不祛拂蒙襟。中尋典學。服攸箴之訓。匪懈厥躬。有如日之明。

不忘于素。涓分可効。蹟殞爲輕。

亳州謝上表

〔案〕表內云二月者乃皇祐三年之二月也據本傳及續通鑑長編那坐其子從張方

繼作及雖參法從願守外藩等語係因庚乞外並無爲子引罪之語疑

那知亳州尙在其子事未發之前座知河南則在其子事既發之後

臣某言伏奉二月詔書。差臣知亳州軍州事。臣卽于三月二十八日到任。訖。渦陽舊里。譙社勝區。聯奧二京之間。參雄三輔之亞。長人如此。銜賜無涯。伏念臣學本迂疎。性非通曉。叨塵禁近。久歷歲時。惟悉心以事君。不因回而取福。居常斂分。動輒省身。正以所得之名。多浮于實。匪衷之服。易用致災。比年以來。宿疾繼作。兩鬢紛白。餘日何幾。雙目眩昏。飛花無數。難參法從。願守外藩。伏蒙皇帝陛下。裁貸慙愚。記憐面目。申擇善地。俾總化條。願臣此州所領七縣。盜賊數發。流亡尙多。所賴首麥向登。膏澍仍降。介農相怵。比屋寢安。仰惟清衷。無及多軫。臣亦早侍祕幄。屢耳聖言。以四方宣力則和。雖一夫失所爲負。敢不勉責吏事。勤諭詔恩。向冀刑罰稍衰。手足知措。倉廩向實。禮節可興。勉衰債之殘軀。報光榮之誤寵。違顏方邇。結戀徒深。

定州到任謝表

〔案〕續通鑑長編皇祐五年正月壬戌。知成德軍宋那知定州。與本傳及此表俱相符合。其成德軍到任在前年七月。故表云甫及中養。更忝茲授也。

臣某言伏奉正月日制詔。就移臣充定州路都部署兼安撫使兼知定州。臣以二月二十五日到任。訖。由中被詔。益北護邊。外循衰癯。陰訟庸短。強顏臨部。捫臆充膺。伏以中山之區。河朔爲劇。作國垣扞。壓敵喉。

標高墉。峯而雲聯。諸屯班以基置。風俗質儉。氣尙強雄。從古以還。號勁兵處。自四道分帥。大將須才。韓琦以舊臣之勞。實首茲選。出入六載。經營百爲。補綻成完。歛頑就法。聲績明具。綱條設張。考課上聞。居治第一。伏惟皇帝陛下。精覈吏事。畱意塞防。謂琦報政之成。進易其地。惟定代更之重。謹擇于人。過聽腐儒。俾嗣前最。伏念臣稱自寒素。得廁班行。所習簡牘之功。不知軍旅之務。比嘗出守。止責親民。故于歲成。偶紆官坐。自塵真定之擢。遂總中權之華。定命不可以固讓還。遠戍不可以不才解。徑趨所莅。甫及半朞。詎謂僉言。更忝茲授。官併二組。地綿九州。且臣自揆所能。出羣臣之下遠甚。潛計其齒。去六十之年幾何。論公則應黜乃遷。語私則當閒反劇。懼溢于喜。榮弗蓋慙。況此州遭水潦之餘。困儲廩之積。且食先軍足。士以馬強。今乃庾乏億秭之饒。牧微駟牝之衍。賢守未辦。況臣至愚。謀夫深憂。況臣淺識。斗筭陋器。蒲柳餘陰。倚以成功。判于諉事。然聞生者士所重。徇義則輕。兵者器則凶。忘教斯怠。臣旣粗識前載。數剽大猷。雖旅力復弗強。知忠孝在所尙。當悉心細大。自力宵旰。奮練戎行。綏育生聚。有如緩急而可用。曾是培克之靡加。至于事當便宜。物有長利。奉上無隱。據義固爭。敢冀容慈。每賜裁赦。乘鄆在遠。拱立賒期。心溯凝宸。魂棲清戟。

謝加端明表

〔案〕本傳：祁在定州。上繫戎論七篇。加端明殿學士。進論在至和二年。見歷代名臣奏議。詣勅在八月。見本集。轉端明殿學士。謝執政啓。

乘寒無狀。增秩蒙褒。賜予侑頒。心顏交斬。伏念臣才弗振俗。仕偶違時。備內朝臣。十有六載。學不足膺天。

平之問。文無以代王者之言。遂圖外邊。冀云少補。惟定武一道。直契丹右廷。咸平以來。號勁兵處。自夏竦分建四帥。韓琦始領九州。節制中軍。部分諸將。琦既進律。臣實代居。以一介懦儒。當萬夫要任。詎難辭劇。奮靡顧愚。然臣所習者藝文。未曉者軍旅。用非所習。雖勤而弗效。責于未曉。故技有必窮。用是再葺。居無底績。在法云殿。惟黜是宜。迺蒙皇帝陛下。憫久成之勞。排彼譖之侈。雖遠猶錄。謂拙可矜。收雲閣之故資。著丹殿之新籍。仍秩經省。未易守藩。叢沓徽章。夸嫖鄙邑。重降嚴旨。切卻讓封。臣亦內揆愚心。旁諗公議。若循禮疊請。則恐涉不誠。或固節還恩。又似規早罷。不有相使。誰扞邊疆。例格除音。孰尊寵數。輒昧涯分。祇服器名。日三省以自營。身九殞而奚報。但臣所念者。邊務至重。敵詐益滋。得人失人。繫今日輕重。知己知彼。爲天下安危。而有司特用苛法相撻。守臣類以生事爲解。封候畏怯。不敢搖手。倉庫虛乏。正可寒心。建明累上。而朝省未從。姑息小虧。則謗囂立至。況臣衰晏。素自憲冥。判無成功。徒忝休命。望審擇于豪俊。俾臨統于方隅。設張遠謀。羈制驕狄。因罄敷于感臆。竊附列于警言。朔壘地卑。君門天阻。被符獨謁。攬綬知榮。

益州謝上表

〔案〕 邢知益州在嘉祐元年八月到任在次年二月

臣某言。昨被嘉祐元年八月詔書。授臣吏部侍郎。仍舊職。移知益州。臣以九月解定州符印。十月過闕下。又奉詔旨。許朝見。面賜訓敕。自見逮辭。凡一月。卽乘驛趨官。以今年二月二十日領州事。既見官屬。卽徧

詢問井病利。皆言稼穡蕃稔。雨暘順時。人安常業。物無翔價。吏下如律。邊尉弛虞。事便于宜。人重犯禁。無邀與邇。式舞而歌。臣身所聞見。與言符驗。伏乞容慈。少寬勤卹。責臣治理。保致嘉靖。伏念臣蚤蒙記識。得籍近嚴。惟知悉心事君。未嘗枉道從衆。是以將賀而弔至。未譽而毀從。一去朝聯。四易藩守。前日鬚澤。變爲華顛。向時疆力。鬱已疋瘵。今又走五千里之遠。委西南面之雄。躡進華資。冒取豐秩。斷斷之伎斯罄。悠悠之言云何。此蓋皇帝陛下。翕受庶工。善養多士。容養助日。收壤培山。料錄宥微。俾充器使。然臣愚有所稟。志不可遷。故直尺若尋。自視無愧。食荼而薺。罔有憚行。況茲圖政之辰。敢負惟良之委。昔王尊一叱其駁。便詔忠臣。何武轉而上聞。粗裨盛德。臣于茲事。未謝前人。假節方初。造廷云阻。叢威斯望。臨文罔宣。

謝龍圖表

(案)本傳。鄒知益州還。以包拯言其兄方執政。不可任三司。乃加龍圖閣學士。據本集西州張系題云。自嘉祐初來州已閱再葬。則此時當爲嘉祐四年。鄒自慶歷三年知制誥。

授龍圖閣直學士。至此已歷十七年。至表內所云翰林端明者。各再龍圖閣侍讀者三。今本傳惟再爲翰林。可攷端明則一見于知定州之日。未詳其再。龍圖閣則一見于罷翰林學士之時。再見于祀明堂。遷給事之時。侍讀則一見于徙知審官院之時。再見于許州復召之時。俱未詳其三。

右臣伏奉今月七日中書劄子。以臣陳讓龍圖閣學士。奉聖旨。令臣依累降聖旨。不許辭讓。便令受告敕者。危懷數陳。嚴音三卻。拒命難固。蒙寵增慙。伏念臣天俸慙。性止崖介。時借其運。實不副名。然十七年中。徧踐美職。爲龍圖閣直學士者一。翰林端明殿者各再。龍圖閣侍讀者三。今又叢資累華。併爲異數。當今兩制兼職。皆不逮臣。材劣衆賢。而恩冠近列。是以亟剖丹若。上格詔文。渙汗弗收。匹夫終奪。昔三綬爲

修兩印自矜。未若臣祕禁經筵。寶圖重構。銜置重複。班級高華。此蓋皇帝陛下。垂憐衰殘。早經驅策。因避嫌之請。增通籍之榮。鉞鉞廐駒。稱服珍帶。山岳施重。螻螻命輕。論報何階。撫躬如隕。

鄭州謝到任表

〔案〕祁知鄭州在嘉祐四年四月。

臣某言。伏奉四月十九日詔書。授臣依前官加龍圖閣學士知鄭州。臣見乞免所加職名。候朝旨外。已于今月二十四日到任。上事訖。讓還劇使。恩與近藩。始冀避親。終成冒寵。伏念臣器識迂暗。年事頽侵。前日護邊。用非所習。向來治蜀。煩不值能。蒙賜代符。進遷計職。適以臣兄庠冠樞近之秩。參調發之繁。誼不處嫌。理容上訴。果沐中旨。許收誤恩。復以華資。實于便地。陪京甚邇。舉族自安。此蓋皇帝陛下。大造曲成。至慈善養。釋臣多懼。惠臣更生。臣敢不奉揚化條。刻誦聖訓。尙期寸效。歸謝上仁。

謝加常山郡開國公表

〔案〕仁宗本紀嘉祐四年十月癸酉。大飭于太廟。大赦戊寅。加恩百官。祁時知鄭州。故表內有盛修合食及守土之拘等語。

臣某言。十月二十三日。進奏院遞到敕誥。伏蒙聖恩。授臣常山郡開國公。加食邑實封者。制出中天。恩臨叢品。捫躬匪稱。拜命載兢。伏念臣才不適時。智非周物。坐逢熙序。歷踐華塗。會國家追講曠代之遺。盛修合食之享。孝思上格。臣職駿奔。俯惟守土之拘。莫預奉璋之助。魂馳龍展。魄集鸞驚。恭惟皇帝陛下。凱澤一均。至仁四被。靡間屏陋。例霑寵榮。集超列爵之高。益厚加田之目。涓塵微効。夙無補于聖猷。穹壤殊私。遽併膺于獎典。重恩難讓。愚悃奚安。徒鏤骨以自期。庶粉軀而論報。

謝轉工部尙書表

〔案〕本傳唐書成。祁遷左丞。進工部尙書。進唐書在嘉祐五年六月。時祁尙在鄭州。至次年始進謝表。故云奉去年六月制詔。又祁有讓轉左丞劄子。見本集。

臣某冒奉去年六月二十三日制詔。授臣工部尙書。職任勲封。食實封賜等竝如舊。仍放朝謝者。成命臨下。愧汗交顏。伏念臣性本迂疏。能有涯分。論撰清選。每得竄名。雖邊要至雄。亦叨假節。奏課弗效。誤眷無酬。向以衆力成書。特恩進秩。避讓既卻。冒受尙新。俄錄歲勤。更偕省坐。名品尤峻。遲暮難堪。但四載敘遷。已成定制。一辭祈免。恐近取名。輒服褻言。肅祇官次。此蓋伏遇皇帝陛下。廣無遺覆。照必逮微。垂記孤臣。普加陟典。敢不益勉。屏陋。愈探典刑。肌骨昭銘。涓埃厯效。

讓加承旨表

〔案〕續通鑑長編嘉祐六年二月甲辰。詔翰林學士承旨宋祁。遇入直。許一人主湯藥。祁以羸疾請之也。加承旨。在五年中。祁卒。則在是年五月丁酉。

右臣今月二十二日。閣門降到誥敕各一道。授臣翰林學士承旨。依前兼端明殿學士。翰林侍讀學士者。聞命震驚。撫躬愧汗。伏念臣病求解郡。恩許還朝。獲便醫藥之良。以救桑榆之晚。是爲再造。舉戴深仁。然自休偃于私居。尙苦纏綿于舊疹。深虞盈滿。遂致顛隕。今茲詔除。尤出望外。且承密旨者。或膺疾召。或訪欲謀。法從翠華之嚴。恭持紫橐之重。必資該敏。仰副睿求。如臣者。年事頽侵。氣力衰耗。且責于必不能者。敗加所不宜授者。僭實累公議。致速身災。自知甚明。人言將至。伏望皇帝陛下。推雲戢瘳。破郤延光。許回誤恩。少安危懼。誓堅九殞。歸謝鴻私。

景文集卷三十九

表

代章集賢讓拜相第二表

〔案〕章得象字希言歷官承旨景祐三年知樞密寶元元年同平章事

臣某言確摯上陳危言若訥猥煩勅曉尙闕俞從內省冒升罔諧寧舍臣聞力不勝而強用者儻石益之則躓視既勞而猶察者與薪值之亦昏何則才局于素定之倪效屈于用多之廣早明茲理敢誓固辭伏念臣本自諸生不經遠物雖圖筮仕止望易農嚮緣邇禁之聯遂忝鴻樞之領投醴嬰屢缺之畏躡足微必勝之譴衆不可誣事皆已試寧足越司天宰之柄上憲乾台之華昏于已窮躓乎強用名器者天下之重師尹者列辟爾瞻濫始于茲下安取法抑又聞宜負而乘小人之盜實招不狩有鶉無功之祿爲刺巧于室者弗令撓而貽壓愛其器者非欲滿而就傾如臣所懷舉皆類此況今權綱俾乂憲度交修方當訪弱翁之賢總領衆職資胡廣之間練達朝章無令蕭枕之餘首玷論思之地伏望皇帝陛下念任人之尤重諒省分之足矜質臣以彼己之言許停贊制免臣以疾顛之咎俾示曲全耆哲在廷俊髦布列枚功而舉謀國必臧瀝危款以罄聞仰睿音之垂可

代楊太尉讓加節度使第一表

〔案〕楊崇勳字寶臣明道元年授檢校太尉山南東道節度使加樞密二年同中書門下平章事

臣某言。伏奉今月某日制命。以修葺大內了畢。加臣某官。落成在旦。懋賞均膺。由置局之有經。枉推恩而異等。罔功已甚。拜賜不遑。竊念臣自闕茸之中。遵亨嘉之會。器非適用。食乃浮人。惟頓少文。罔裨于紀律。樸忠自任。僅宿于官箴。猥蒙大度之容。進貳中樞之職。一昨大營層構。別建攸司。領使以上公之尊。咨副于邇臣之列。不圖推擇。偶及妄庸。臣于斯時。罔及崇讓。誠以二宮側身之際。百役僦功之辰。冀率寸長。仰寬旰食。其如庶民樂勸。百堵竝興。有茂宰以建規。有勞臣之宣力。臣但參陪廟算。奉行符節。無黍稷之重。無涓澶之勞。訖太紫之雄成。塞天淵而渙汗。猥紆成命。序進寵名。錫號以紀庸。爰田而衍食。本兵劇職。疏社近藩。而臣退省其私。何力之有。掩上之功。則在體不順。掠下之美。則多謗其與。取身之災。爲國深悔。兩失其道。人將謂何。伏望皇帝陛下。收已澍之仁。據循名之實。許還誤賞。無俾濫官。責其陳力之微。紆以害盈之咎。日有三舍。或遇感而必移。志在匹夫。信有誠而無奪。援天惟切。得請是期。

代楊太尉謝加節度使表

臣某言。近以虔奉制恩。驟膺寵數。尋露章而再瀆。冀還賞于至公。游沐慈音。仍斷來表。祈天靡諒。拜命知榮。竊念臣論品下中。賦材弱植。緣先朝之誤寵。收一介之微勞。感會風雲。汗塵名器。執戈外禦。適遭偃兵之期。涉級序升。遂竊登壇之拜。總提師律。拱衛宸居。積日爲慙。無勞可紀。不圖聖獎。擢貳近樞。坐席未溫。營宮勿亟。咨宰庭而命使。挾戎帥以領徒。曾是妄庸。亦參經畫。逮落成之告始。顧居逸以興懷。百詔攸司。

聿陳盛禮。應天以實。哀對于廟靈。與物惟新。茂宣于雷解。祈年易日。集福推恩。而臣底績至微。備員有素。因端闡之策賞。紆溫檢以開榮。視秩本兵。建藩維翰。益勳臣之殊號。增采邑之眞封。矧基命預聞。邇臣同體。上方引咎。克謹于盈成。下或分功。何顏于啓處。寵靈踰分。震怖裝懷。瀝懇固辭。成命難寢。亟煩褒諭。祗益罪尤。斯蓋伏蒙皇帝陛下。變復在辰。寬仁布度。姑厚惟平之施。勉從寧僭之科。臣敢不祇服訓言。罄輸忠力。防幾事之誠。無俾害成。佩進忠之言。更思盡瘁。永惟素守。用質幽神。

代上皇太后第一表

臣某言。斯干勿亟。式壯宸居。麗澤遂行。首襄樞管。省貪天而冒賞。舉闕地以增憂。竊念臣智效有涯。親逢爲幸。宜疏而裨。濡翼于梁。倚上聖之兼包。遏煩言之舉劾。擢于宿衛。外佐樞衡。間屬完復。宜溫繕圖輪奐。事資專達。別建攸司。官必有聯。用均底績。臣始從末至。遽貳敷求。冀千慮于參裨。希萬分于報稱。而寸長自驗。任重咸知。上則祇稟于謀謨。次乃倚成于衆力。秩未加而爭勉。功不日以慶成。千門羣飛。百堵山立。而臣委此在列。拱默居官。訖乏儔功之能。仰裨煩使之任。今乃溫辭誕告。列位徧聞。特移近鎮之崇。兼領上公之秩。任官密勿。廩食豐融。曾是冒居。疇能安處。雖含垢者。天道姑務樂成。而缺望者。衆心無容厭服。伏望皇太后陛下。察其退省。惠以克終。追改命書。弗加虛飾。必若篤臣鄰之分。懋功賞之科。則陳力有期。或容于積日。陟明無濫。更俟于宣勞。臣止乞比類近班。例外彝序。庶乎不僭。以肅無厭。願回從欲之仁。垂

采薄言之訴。怔忡于此。俞可是期。

代第二表

臣某言。臣近以崇進寵章。輒騰讓奏。大言垂答。成命未還。慙衷所并。懾處無措。竊念臣材姿蹇淺。地望單平。獲對聖期。遂階樞柄。汲深綆短。自審于無能。材敗錦傷。慮隳于有典。值國家從周考室。嗣禹卑宮。獲贊事經。亟成丕績。惟當陽之引咎。因肆眚以翔仁。首眷近班。竝推異數。鴻私交委。危懇匪寧。何則。密勿之司。體均休戚。彌縫之任。責在臣鄰。當九重旰食。以勵精。寧百執晏安。于受爵。上虧治表。俯畏人言。伏望皇太后陛下。垂照危悚。曲全瑣質。重名與器。罔俾于官邪。收紵以綸。特從于人欲。儻道易盈之責。實銜再造之私。

代謝皇太后表

臣某言。近膺制命。崇進寵章。再瀝危悚。冀回誤賞。俄枉斷章之旨。俾遵踐次之規。徇守莫從。拜嘉何幸。竊念臣本由羈齒。獲遵亨期。頃在先朝。已嘗劇職。協華繼照。圖舊見收。擢領干城。畱參離衛。漢臣少戀。僅乃過之。林父盡忠。自知底止。偶偕天幸。遂貳帝樞。親佩疇咨之言。預聞甚衆之事。營宮度室。權使慮功。匪伊乏人。姑願宣力。而靈臺勿亟。斯干落成。惟翼翼之小心。答高高之深戒。肆類霄極。祇格廟祧。沛爲鴻恩。賚及羣品。薰至和于有截。示昭德之不違。乃眷臣工。竝推獎數。而臣揆庸最淺。進律首加。奄土宇之版章。擁

名器之烜赫。疾顛是懼。薄祈載勩。而孤根莫隔于青春。幽盆遂均于白日。循牆罔獲。濡沫增慙。斯蓋皇太后陛下。協暢懿綱。輔成至治。謂已行之賜。寧僭而不收。俾無用之臣。未勞而先祿。敢不力希汝弼。務告斯猷。式是柔嘉。保乎慎密。循孤生而有託。喻厚報以無涯。

代楊太尉讓樞密使第一表

〔案〕楊太尉即楊崇勳。

臣某言。伏奉今月五日麻制。授臣依前官充樞密使。餘如故者。躡等之恩。猥加叢質。本兵之地。超以宗工。聆誕告以不遑。撫危心而如灼。竊以天人感會之要。夙夜宥密之嚴。號爲樞衡。罔私名器。自匪安世之慎。林父之忠。履無重剛之疑。進有九鼎之重。必程茲效。始免冒居。如臣者。根柢微材。斗筭近器。親逢聖旦。假歷要塗。將將之仁。上依于漢度。師師之序。久玷于堯官。中寢告成。攸司何力。例蒙需寵。改就近藩。讓不獲從。坐猶未暖。旋頒渙號。俾正使名。總異數以大來。匪孤臣之克荷。且臣聞之。愛官同乎美錦。用士異于積薪。使人皆學製。則百度且虧。後而居上。則有功不勸。而況擢于數臣之末。抗乎三事之尊。力且未陳。進仍無漸。伏望皇帝陛下。據其器使。貸以滿盈。追罷徽章。許仍故處。用勤補過。少冀于萬分。歷級升階。況存于有典。庶全邦體。恭俟天從。

代上皇太后第一表

臣某言。隆名烜赫。異數便蕃。辱誕告于王庭。俾顯升于樞府。缺然無狀。惴若臨淵。竊以運動二儀。本之樞

軸昭明萬事。責在股肱。自置使以居中。匪得人而莫可。況乎下武。尤慎曠僚。伏念臣系本孤平。材微開濟。由驂之靳。四服于馳驅。如山出雲。偶邀于期會。任圖大事。蔑報萬分。因考室之微功。辱改藩之茂渥。號封兼列。錫予孔蕃。方且澡雪愆冥。講求故實。俟愚者之一得。塞小人之攸箴。而成命涪頒。榮階逾緝。由數臣之後。進領上司。未三旬之間。再煩大貺。顧惟冒處。實速多言。且用在材表者。有必窮之期。賞超功外者。無能守之實。下取四夷之哂。上紊百工之倫。祇悔既多。害益可待。伏望皇太后陛下。諒其惴惴。輟乃寵章。且延積日之期。俾竭寸長之效。漸希有補。乃議敘升。在授受以爲宜。亦等威之不僭。倘蒙順許。是免顛隕。

代楊太尉讓樞密使第二表

臣某言。昨以肅膺茂典。進列上樞。亟露奏函。願還賞典。叢爾之誠。無感。往哉之訓。不移。夙夜以思。慄慄罔寘。竊惟官可以闕。不可任非其人。邑雖與多。無容假之以器。何則。十手甚衆。百度所叢。允當則丕命其承。虛授則浮言肯動。況幾微開策。左右仰承。累苟及邦。身焉賴寵。臣甫從末至。未究大猷。猥屬建元。例蒙進律。已忍慙而冒處。冀陳力以少疇。寧謂宸衷過私。贊畫旋降。正名宥密之署。財或一二之幾。內揆妄庸。曷先勝處。夫棟幹或橈。則困于衆材。馬力已殫。必要其所駕。國之闕政。常必由之。士有食功。亦宜底止。伏望皇帝陛下。追收允令。改命能賢。暴剝牘于百工。紓賤軀之九殞。罄敷危控。虔俟俞從。

同前上皇太后第二表

臣某言。近膺明制。擢拜上司。入竝宗臣。對執樞柄。尋露情于尺奏。冀收縛于誤恩。答命雖頒。愈音彌阻。省循至再。震越無從。臣聞善持器者。不欲滿而就傾。巧度材者。不使曲而強直。物宜尙爾。人理則然。故責功者過量。乃傷陳力者不能而止。敢援斯喻。備述愚衷。竊念臣慮靡經邦。官纔宿業。獲階近綴。未及半葦。爵與衆而例加。讓蒙恩而弗聽。瘳官之誚。曷日可逃。不圖含垢之仁。復舉揚庭之典。知小謀大。任重道悠。國有曠官。身餘後咎。脫致彝倫之紊。寧容一介之誅。伏望皇太后陛下。體斷斷之能。居然愆短。察縷縷之請。罔俾官邪。許停授受之恩。實荷平成之賜。

代楊太尉謝樞密使表

臣某言。昨以叨膺茂典。入管鴻樞。伏省戶以陳章。丐綈囊之收需。危悚再瀆。明制必行。懼煩失以致尤。輒進思而冒處。臣聞佐王基命。簡在臣隣。秉軸居中。本之兵柄。非有號令風采。爲下所瞻。則必愾臆謀謨。熙天之載。異于茲道。孰匪曠官。竊念臣材庸乏施。地寒寡援。與顏行之下。因得累勞。陪周衛之中。罕嘗進熟。見容漢皇之度。久總軒師之營。貳宰繁機。佐經中寢。會落成而不日。因愆祀以祈年。汪濊深仁。導迎協氣。而臣弗從災異之變。更加名器之多。寢默懷安。委蛇就列。內循無狀。自詭必酬。何月律之未淹。沐天私而載造。擢于未綴。遂正近司。輒成奏以讓還。枉深辭之切勅。薄言匪控。進拜增差。助百姓之昭明。行虞辱國。千六符之疏闊。舉畏談天。斯蓋皇帝陛下。養以至仁。赦其少戇。同五帝之親事。不及有司。俾一介之孤臣。

無空大位。敢不益勤縣力。罔伏舊章。期有補于萬分。敢自紆于九殞。

同前謝皇太后表

臣某言。近叨恩制。俾正樞司。伏閣上言。願還于成命。斷章催拜。再枉于慈音。固讓莫諧。冒居何幸。竊念臣液。構材散培。壤地卑。獲對聖期。屢揚劇任。敵王所愾。既會于偃兵。積日之勞。何從而塞責。洪惟職覆。深諒由衷。斯謀斯猷。罕嘗入告。予求予取。不議汝瑕。惟先帝之舊人。貳禁庭之幾事。屬圖考室。兼議僉功。燕寢乃安。顧成竝享。紀年肆眚。舍爵計功。首膺無戲之言。已援于宜之數。僭夫國典。布在人言。豈謂天眷謬加。寵章尤渥。靡倫彝序。超據上游。壅薄訴于危心。隔蓋高之善聽。光華異等。震扑裝懷。三接謬譔。未識主臣之對。萬幾處可。曷臻密靖之風。乘是泰來。缺然升授。此蓋伏蒙皇太后陛下。道敷善養。人不備求。貸衛綰之執何。取子顏之謹質。特捐厚禮。期責寸長。願懋賞以不貲。誓捐軀而有所。

代楊樞密謝加恩第一表

臣某言。廟藉歲儀。竝修于典業。飲勳論至。申告于治朝。顧無狀之具臣。濫本兵之右職。便蕃荷寵。慙媿交顏。竊聞賞以功爲重輕。官用能爲次序。故公器者假之于下。則伐檀之刺興。天秩者授之以庸。則緇衣之風勸。上闢損益。昭見典章。如臣者。志抱樸忠。任非文敏。攀鱗附翼。實出親逢。壯事老謀。驗于已試。擢升宥密。未閱歲時。蒙含垢之至仁。遏空殮之橫議。竄惟天幸。亟相帝容。陪駟乘以清塵。從春旂而賑土。徧升七

室用劬九農而臣自始屬圖則乏倪寬之建白逮于相禮則有孟僖之坐慙奉凝蹕之還衡琢溫瑜而升冊會微千慮少答萬分免戾爲多開榮非覬又況崇階異數衍食陪封卽舊以表其新臨懼更延其寵臣躬雖幸國體謂何儻腊毒以冒居實敗材之行及伏望皇帝陛下推明有典詢逮羣言用必役其所長賞不加于非次收還成命昭示倍官弗與鐘鼓之妖俾緩冰淵之懼探情非飾瀆聖奚逃

同前上皇太后第一表

臣某言廟筵升禩陽土就耕竝成希闕之儀徧第臣鄰之賞顧惟輶眇猥玷近樞優渥首加震惶罔寅竊念臣器非適用材不及中感會風雲滴除埃壒歷更華劇滋驚歲時會不能僊俛宿官從容進執建明事望練達政宜徒以上庠晏晏之仁中懷齟齬之謹曲輪直桷有性分之專乘雁雙鳧無盈虛之係入司機管參決謀謨屬以慈極奉先長君勸穡枚枚闕宇薦一德之馨香灼灼大田震九陽之滿眚禮兼今昔聲塞天淵而臣但荷親逢絕無云補將順其美則當國之輔在焉屬圖其儀則搢紳之儒戾止安可因飲至之際遂竊崇階無計功之差例增采戶使勞臣缺望多謗沸騰尙貽戮于代天諒胡顏于接畫伏望皇太后陛下察其知止惠以有終協贊當陽垂收渙汗且夫物過于鑑則照有必窮鼎渥其形則餽將必覆願回慈護矜允危悚或免戾之可期實捐軀而知報

代宋資政謝大學士表

〔案〕宋綬字公垂歷官參知政事資政殿大學士

臣某言。伏奉制命云者。大言申獎。清職躋華。揆寵欲驚。真顏靡所。竊念臣稟生。臆弱循志。樸忠典學。在勤課功。寡要惟仁。與義慕大夫之求。匪智而愚。爲有道之累。逮事真考。已列從官。愛不汝疵。舉知帝力。伏惟皇帝陛下。邁成丕烈。樂育譚材。專錄文林之勤。召升嚴署之選。嘗令守屏。旋詔歸臺。肇啓祕宸。顯標通籍。時惟輔相之缺。忝貳論思之餘。躋聖在宸。備員取悔。蒙收還于機務。乃厭息于謗言。改服禁班。別陪經省。仰緣簪履之舊。奉望帷幄之中。然而志以憂摧。氣隨懼奪。煩心易感。末疾間乘。孰爲四體之勤。纔煩三月之免。彌年無狀。有衆具知。敢圖則哲之明。更濫惟名之假。矧茲峻等。創自先朝。未始平除。蓋無常置。本臣鄰之均逸。故位絕以至優。寧容孤生。冒處茲任。竄景風之餘曲。取鞞佩之深譏。斯蓋陛下。夙諒孤危。審非讎黨。大明垂燭。蔀屋之家。罔遺和氣。憤蒸拔楊之柢。重茂靜循榮渥。冀絕常均。儻可效于寸長。誓無忘于夕隕。

代謝加恩表

臣某言。昨以虔貢露封。讓還渥典。訥辭雖達。善聽靡回。煩深詔以爲言。俾斷章而趣受。拒恩難瀆。拜賜奚勝。竊念臣稟質至愚。逢辰最舊。久參宰政。訖乏寸長。嚮屬三歲常郊。萬靈介祉。翼翼文考。推以配天。實實闕庭。盟而竝薦。得陪顯相。協戴上儀。居謝徐生之容。無裨伯始之問。何言飲至。亦與疇勞。內積冒居之慙。慮開缺望之隙。丐收茂渥。用穆彝經。而遴布俞音。慎行出令。廢其悃悞。敦以寵靈。表雲臺之美名。賁巖廊。

之要望。階章魏品之峻。勳柱楚官之華。參萃于斯。爲榮尤至。得非寧賞而僭。在邦體之則然。匪汝爲疵。特君養而無恐。輒膺敷錫。增激懦衷。此蓋陛下欽待臣鄰。懋明憲度。祿以爲砥。冀磨鈍于人。賜不踰時。示勸能于後。遂令緜薄。首被慶私。惟百慮以勉修。期萬分之稱報。

代孫侍郎謝加龍圖閣學士表二首

〔案〕孫奭字復古。仁宗即位。遷工部侍郎。天聖中。加龍圖閣學士。

臣某言。天臺封劄。忽被于壇。委神閣直圖。俾陪于清綴。卽支離之病叟。參汗漫之仙游。崇讓無從。省躬增憤。竊念臣材非傑出。世本曠僚。志安草茅。望隔青紫。逮事真考。擢備從官。預擁橋門之經。俄待承明之詔。力非稽古。陳車服以旣多。義乃不耕。食困禾而太厚。託上仁之廉養。匪予取以見疵。訖乏寸長。以終無補。陛下丕承在旦。善貸均休。念舊物以軫慈。由至愚而取信。每緣沛洽。游辱進升。出則陪清道之遊。入則奉邇言之問。龍光所集。儒者罕偕。頃緣匪服之災。迭遘負薪之疾。氣一交還。體不自支。涉月臥廬。移書請急。方將再拜歸道。漸露乞骸之求。百工咸熙。少息瘝官之議。雖私惊內斷。會成命已頒。謂寶構之嚴凝。號文林之極摯。青蒲規地。近接禁林。朱葉藏文。居然帝所。以原簪之未棄。俾龍署以叨榮。嘉亨允鍾。夙暮深計。且臣忝識大分。久服近班。伸于至明。誼不徒讓。又被寵先帝。結犬馬之戀深。歸報二宮。慮桑榆之日短。苟遽巡遠命。偃蹇懷安。上孤圖任之私。下取自高之譽。臣雖無狀。寧昧所歸。輒拜貺以自天。誓糜軀而有地。儻神明之觀未耗。而筋力之能可求。尙當夜思晝行。克守無邪之誠。早入晚出。懋敦時敏之方。展四體以

上酬。泯百生而後已。

臣某言。華戶病居。方累支離之歎。蘭圖祕構。忽塵清切之司。駭細割之已行。躍羸軀而祇受。一辭罔遂。三省增慙。竊念臣學術本疎。行能無算。起家東鄙。玷跡周行。紆眞聖之誤知。偕邇臣之旅進。淺謀料事。無助幄中之籌。直道干時。常貨道邊之死。計功未效。僭賞云多。恭遇皇帝陛下。察無他腸。垂矜舊物。忘其逢顛之陋。飾夫犧木之文。超狃神深。浣陪講勸。而臣將身寡術。匪服挺災。及此首冬。繼成淹臥。造朝希闊。伏枕纏綿。且念舊章不忘。臣則無胡廣之智。大事垂問。臣則乏仲舒之才。在九覲以不盈。去雙鳧而非少。宜先引避。以肅懦貪。私計未行。洪恩俄降。罔示汰澄之責。更階嚴近之資。臣夙夜自惟。揆卜宜審。且下知止足。蓋一身之謀。上所懋官。爲百辟之舉。苟曰圖大。無容後公。詎可遠忘先帝之恩。近矜小讓之節。臣知非是。物誰謂宜。用僶俛以拜嘉。勉婆娑而陳力。冀調醫齊。益就平疆。厲乃樸忠。絕其吐茹。庶追玉堂之汗。少裨黃髮之詢。一死可畱。期報恩而不朽。三軍能奪。誓刻志以無渝。至禮不文。感悚奚隱。

代鄭公授知制誥謝表

臣某言。伏奉制命。蒙恩特授臣本官知制誥。并賜金紫者。祇居宰庭。猥具代言之草。參華掖署。遽塵通貴之階。寵溢所涯。畏深餘慄。竊以隨風之命。本鼓舞于庶方。成綽之言。實權輿于四禁。張官至重。責實惟艱。自非業廣器閎。文深職敏。揆雅奧之明義。屏愆忘于舊章。則何以參直祕曹。對司允令。慎徽布度。克成近

雅之風。給藻會機。仰賁彌文之化。親逢景運。遘東惟人。若臣者。篆刻偏才。簪纓墜緒。紆先榜之占籍。叨神壤以陶風。不觀非聖之書。僅承遺業。竊冀上農之祿。庶代寒耕。會天歷之初元。舉貢條之舊式。猥緣薄技。升冠甲科。一命卿僚。貳參郡政。逮及瓜之趨節。旋給札以試言。超踐宮坊。入塵史觀。承人之乏。遂贊計筭。遘天之瘳。自嬰家釁。痛上恩之未報。分餘喘以斯淪。哀紀俄周。槁骸故在。辱台符之振敍。復朝紱之光華。荐居勾失之司。仍貼記言之局。歲逢會課。例及當遷。陟諫省以尸榮。彌縫未効。坐禮闈而辨秀。衡藻無裨。靜言備位之慙。宜實黜幽之典。迺蒙皇帝陛下。敷求介善。樂育羣材。念久次于書林。絕先容于仕路。特頒俞旨。改命清司。因程奏之升聞。紆睿辭之訓勅。就加金艾之服。以獎朝廷之容。況職業所存。典章可復。各居一戶。非人則上動祕躔。分押六曹。直日則專司進畫。詎伊庸懦。可稱恩華。然汗令之已行。顧驚筋而思勉。謹當奉循丕律。輸罄樸忠。寢階寡悔之方。用畢捐生之報。臣無任戴天荷聖。激切屏營之至。

